

توفيق الحكيم

رسالة في القلب

مع أغاني الموسيقىار محمد عبد الوهاب

منزوم الطبع والنشر
مكتبة الآداب ومطبتها بالجاميزة ٩١٩٣٧٧
٤٢ ميدان الأوبرا - ت. ٩٤٠٨٦٨
المطبعة النعموز جيزة
٦ مسكة الشاورك بالحلمية الجديدة

رقم الإيداع ٨٥/٣٩٣٠
تتريه الولى X - ٠١٣ - ٤٧٢ - ٩٧٧

كتب المؤلف نشرت باللغة العربية

- ١ — محمد رحمته (سيرة حوارية) ١٩٣٦
- ٢ — عودة الروح (رواية) ١٩٣٣
- ٣ — أهل الكهف (مسرحية) ١٩٣٣
- ٤ — شهر زاد (مسرحية) ١٩٣٤
- ٥ — يوميات نائب في الأرياف (رواية) ... ١٩٣٧
- ٦ — عصفور من الشرق (رواية) ١٩٣٨
- ٧ — تحت شمس الفكر (مقالات) ١٩٣٨
- ٨ — أشعب (رواية) ١٩٣٨
- ٩ — عهد الشيطان (قصص فلسفية) ... ١٩٣٨
- ١٠ — حمارى قال لى (مقالات) ١٩٣٨
- ١١ — براكسا أو مشكلة الحكم (مسرحية) ١٩٣٩
- ١٢ — راقصة المعبد (رواية قصيرة) ... ١٩٣٩
- ١٣ — نشيد الانشاد (كما فى التوراة) ... ١٩٤٠
- ١٤ — حمار الحكيم (رواية) ١٩٤٠
- ١٥ — سلطان الظلام (قصص سياسية) ... ١٩٤١
- ١٦ — من البرج العاجى (مقالات قصيرة) ١٩٤١
- ١٧ — تحت المصباح الأخضر (مقالات) ... ١٩٤٢
- ١٨ — بجماليون (مسرحية) ١٩٤٢
- ١٩ — سليمان الحكيم (مسرحية) ١٩٤٣
- ٢٠ — زهرة العمر (سيرة ذاتية — رسائل) ١٩٤٣

- ٢١ — الرباط المقدس (رواية) ١٩٤٤
- ٢٢ — شجرة الحكم (صور سياسية) ١٩٤٥
- ٢٣ — الملك أوديب (مسرحية) ١٩٤٩
- ٢٤ — مسرح المجتمع (٢١ مسرحية) ١٩٥٠
- ٢٥ — فن الأدب (مقالات) ١٩٥٢
- ٢٦ — عدالة وفن (قصص) ١٩٥٣
- ٢٧ — أرني الله (قصص فلسفية) ١٩٥٣
- ٢٨ — عصا الحكيم (خطرات حوارية) ١٩٥٤
- ٢٩ — تأمت في السياسة (فكر) ١٩٥٤
- ٣٠ — الأيدى الناعمة (مسرحية) ١٩٥٩
- ٣١ — التعادلية (فكر) ١٩٥٥
- ٣٢ — أيزيس (مسرحية) ١٩٥٥
- ٣٣ — الصفقة (مسرحية) ١٩٥٦
- ٣٤ — المسرح النوع (٢١ مسرحية) ١٩٥٦
- ٣٥ — لعبة الموت (مسرحية) ١٩٥٧
- ٣٦ — أشواك السلام (مسرحية) ١٩٥٧
- ٣٧ — رحلة الى الغد (مسرحية تنبؤية) ١٩٥٧
- ٣٨ — السلطان الحائر (مسرحية) ١٩٦٠
- ٣٩ — يا طالع الشجرة (مسرحية) ١٩٦٢
- ٤٠ — الطعام لكل قم (مسرحية) ١٩٦٣
- ٤١ — رحلة الربيع والخريف (شعر) ١٩٦٤
- ٤٢ — سجن العمر (سيرة ذاتية) ١٩٦٤
- ٤٣ — شمس النهار (مسرحية) ١٩٦٥
- ٤٤ — مصر ضربان (مسرحية) ١٩٦٦

- ٤٥ — الورطة (مسرحية) ١٩٦٦
٤٦ — ليلة الزفاف (قصص قصيرة) ١٩٦٦
٤٧ — قالبنا المسرحي (دراسة) ١٩٦٧
٤٨ — بنك القلق (رواية مسرحية) ١٩٦٧
٤٩ — مجلس العدل (مسرحيات قصيرة) ١٩٧٢
٥٠ — رحلة بين عصرين (ذكريات) ١٩٧٢
٥١ — حديث مع الكوكب (حوار فلسفي) ١٩٧٤
٥٢ — الدنيا رواية هزلية (مسرحية) ١٩٧٤
٥٣ — عودة الوعي (ذكريات سياسية) ١٩٧٤
٥٤ — في طريق عودة الوعي (ذكريات سياسية) ١٩٧٥
٥٥ — الحمير (مسرحية) ١٩٧٥
٥٦ — ثورة الشباب (مقالات) ١٩٧٥
٥٧ — بين الفكر والفن (مقالات) ١٩٧٦
٥٨ — أدب الحياة (مقالات) ١٩٧٦
٥٩ — مختار تفسير القرطبي (مختار التفسير) ١٩٧٧
٦٠ — تحديات سنة ٢٠٠٠ (مقالات) ١٩٨٠
٦١ — ملامح داخلية (حوار مع المؤلف) ١٩٨٢
٦٢ — التعاقدية مع الاسلام والتعاقدية ١٩٨٣
(فكر فلسفي)
٦٣ — الأحاديث الأربعة (فكر ديني) ١٩٨٣
٦٤ — مصر بين عهدين (ذكريات) ١٩٨٣
٦٥ — شجرة الحكم السياسي (١٩١٩ - ١٩٧٩) ١٩٨٥
-

الاهداء

إلى

محمد عبد الوهاب

موسيقار الأجيال

بمناسبة مرور ٥٠ عاماً

على قلبه «رصاصه في القلب»

الفصل الأول

عيادة طبيب . مكتب الدكتور . حجرة لها نايلان . الدكتور سامى يخلع على عجل المطف الأبيض ويرتب هندامه الخارجى بعناية بعد أن ينظر فى ساعة ذهبية فى معصمه... ويتأهب للخروج . جرس التليفون يدق فوق المكتب ..

سامى - (يجرى على صوت جرس التليفون) ألو - أنا الدكتور سامى نفسه ، مين ؟ أهلا وسهلا .. حاضر يا فندم عنوان البيت شارع القصر العينى ، بعد ساعة أكون عندكم . قبل كده مشغول . بس خليه ياخذ مسهل .. (يفتح أحد البابين ليخرج وهو يصفر بغمه مبتهجا فيصطدم بشخص حسن الهندام داخل فى هياج واضطراب بسم الله الرحمن الرحيم ا جرى إيه مالك يا نجيب ؟

نجيب - (وهو يلهث برتمى على أقرب مقعد) أسكت أنا توفيت!

سامى - حد قابلك من اياهم . قلت لك ألف مرة اقصر الشر وابتعد عن الشوارع اللى بيطلعوا لك فيها أصحاب الديون بالنهار !

- نجيب - (في صوت متداع وهو مضمض العينين) مش ديون ..
- سامي - امال ايه الحكاية .. مالك ؟ ماتضيعش وقتي .. أنا لازم اقابل خطيبتى حالا .. (ينظر لى ساعته)
- نجيب - ابعت حالا هات لى واحد حكيم ..
- سامي - وانا يعنى امال هنا طرطور
- نجيب - (ممددا على القعد) آه يانى .. رحى خلاص
- مأسوفا على شبانى !
- سامي - اسمع يا نجيب .. ان كان غرضك تتسلبط علشان عايز لك ريال أو نص ريال قل لى وبلاش ضياع وقت
- نجيب - مش مسألة فلوس . بقول لحضرتك اناميت . هو يعنى علشان ما اكون مت لازم يدفتونى فى قرافة المجاورين ..
- سامي - والكلام المفيد دلوقت ايه بقا ؟
- نجيب - الكلام المفيد انى انا دلوقت مضروب بالرصاص .
- سامي - (فى استغراب) رصاص ؟
- نجيب - انضربت بالرصاص قدام « جرونى »
- سامي - ياخبر ! بتقول ايه ؟ جد يا نجيب ؟ وساكت ليه

من الصبح . فين . . . (ينادى) يا . . . عوضين !!
الترجى مش هنا . انت لازم لك اسعاف حالا ..

نجيب - أيوه اسعفى . .

سامى - (يدنو منه ويخلم ملبسه) اكشف الجرح بسرعة .
دخلت فين الرصاصة ؟

نجيب - (يشير الى قلبه) هنا !

سامى - (فى دهشة) مش ممكن !

نجيب - (يشير الى قلبه بشدة) بقول لك هنا

سامى - مش معقول . انت يظهر ما عندكش فكرة عن
الطب بالمرّة .

نجيب - ماليش دعوى بالطب . أنا بصفتى مضروب رصاصة
أقول لك انها واقفة هنا . وانت حر تصدق والا
ما تصدقش .

سامى - دا القلب يا مغفل . رصاصة فى القلب ولسه عايش .
انت عايز تطير من عقلى حبة الطب اللي باكل بهم
عايش !

نجيب - ومين قال لك انى لسه عايش ؟

- سامى - بتقول إيه ؟
- نجيب - بلغ عن وراثى حالا بصفتك حكيم !
- سامى - لازم الرصاصة دخلت فى عقلك !
- نجيب - الرصاصة هنا فى القلب
- سامى - (يجس نبض نجيب) مفيش حاجة أبدأ عندك . نقطة دم مفيش . النبض طبيعى . القلب سليم . . .
- نجيب - القلب سليم . سليم يا جاهل . الفحصنى كويس . انت شايفنى نجيب بتاع الصبح ؟ أنا شخص آخر ياسامى من مدة ٧ دقائق . أنا فى عالم آخر من مدة ٧ دقائق
- سامى - (ينظر الى نجيب لحظة) انت بتحب !
- نجيب - لأول مرة فى حياتى
- سامى - كل نوبة تقول دى أول مرة فى حياتك
- نجيب - أبدأ . المرة دى بس . لأن الرصاصة هنا . . .
- سامى - رصاصة إيه !
- نجيب - عينيا ياسامى ! نظرة واحدة ما فيش غيرها ! عينيا تقابلت عفواً ! خلاص . شعرت فى الحال بحاجة

دخلت هنا . . (يشير الى قلبه) ولا طلعتش . لسه
موجوده . . هات إيدك . . (يمك يد سامي)
شوف . . . جس . . .

سامي — (يجذب يده) مين دي ما عرقهاش ؟
نجيب — أبدأ . كانت را كبة أتومويل طول الأودة دي
مرة ونص . وواقفة قدام جروبي تا كل (جلاس)
سامي — وانت كنت فين ؟

نجيب — كنت باخد واحد ويسكي على البار . واحد بس
« ايرتيف » مفيش غيره . وأنا خارج لقيت عينيها
في عيني راح قلبي عامل كده . . (يقبض يده)
وراح ساقط تحت رجلي واتدحرج في الشارع على
الأسفلت . . .

سامي — لغاية ما وقع في بلاعه !
نجيب — ما أعرفش راح فين
سامي — وبعدين ؟
نجيب — وبعدين شفتها نزلت ومشيت في شارع المناخ في
اتجاه الأوبرا .

سامى - مشيت وراها طبعاً.

نجيب - انت مجنون! وأنا أقدر أمشي في شارع المناخ؟
عايز يقفشوني قدامها وأبات الليلة في القسم؟

سامى - أيوه صحيح دا من الشوارع الممنوعة . مش واخذ
بالى . . لك فيه على الأقل ثلاث زباين من إياهم .

كوستا الترزى وشالوم الجزمى وماريو الحلاق .

نجيب - (في حنق) مسألة الشوارع دى بقت حاجة تجنن .

أروح فين يا ناس؟ مفيش شوارع كفاية في مصر . ان

ما كنش مصلحة التنظيم تفتح حالا شوارع جديدة

وآلا يعملوا مترو تحت الأرض أو ترامواى في

السيما . . . اللهم أنا خلاص ما ليش عيش في البلد .

سامى - (باسما) أنت ممنوع من المرور في كام شارع؟

نجيب - (ناظرا في أجنده) أقول لك ياسيدى : خد عندك

المدابغ لغاية النص وقصر النيل بعد سليمان باشا

والمناخ جزء منه وبعض شارع فؤاد وشارع كوبرى

قصر النيل . وأما الضواحي فصاحب الملك ساكن

في الزيتون .

سامى — وأخيراً عملت إيه فى حكايتك؟ .. طارت منك ..

نجيب — طبعاً

سامى — والنتيجة؟

نجيب — النتيجة . مفيش نتيجة غير انى دلوقت محسوب فى عداد الأموات وشوف لى طريقة . لأن المسألة

جد مش لعب

سامى — أشوف لك طريقة ازاي . ما سألتش مين دى بنت مين؟

نجيب — أبداً .. أبداً ..

سامى — ما شفتش نمرة الأتوموبيل كام؟

نجيب — أبداً .. أبداً ..

سامى — طيب تعرف ماركتة ايه الأتوموبيل على الأقل؟

نجيب — أبداً .. أبداً .. ما أخذتس بالى . هو أنا كنت

فاضى أشوف ماركة الأتوموبيل والا ماركة وشها .

سامى — وماخذتس تا كسى ورحت وراها تشوف سا كنه فىن؟

نجيب — أبداً .. أبداً ..

سامى — ادينى عقلك اعيزنى أعمل لك ايه بقا بدمتك؟

كل حاجة أبداً .. أبداً . شارلوك هولمز أنا والا

- شهورش؟ والا عازني أضرب لك الرمل؟
- نجيب — انت مستحيل تعرف الحب . آدى كل اللي أقدر أقوله بالاختصار لواحد مغفل زيك .
- سامى — أشكرك . أوفوار . (يتحرك للخروج)
- نجيب — اسمع . أنا لأول مرة في حياتي اتلخمت . . . وبقيت واقف تايه مش حاسس بالدنيا . وفجأة طلعت أجرى حاطط إيدى هنا . . . (يشير الى قلبه) زى واحد مضروب عيار نارى . لغاية ما وصلت عيادتك تسمى ده ايه . . ؟
- سامى — أسميه مرستان !
- نجيب — الحب الحقيقي . اللي ما يحصلش إلا مرة واحدة في الحياة؟ !
- سامى — عندها أتوموبيل طول الأودة دى مره ونص . تمام أهو ده الحب الحقيقي . هسبانو . ريزوتا فراسكىنى با كار . ماركة من دول تفتح لك جميع الشوارع الممنوعة ، ولا تحتاجش لمصلحة التنظيم .
- نجيب — (يبصق في الارض إزدراء) أنت رجل مادي!

سامى — اسمع يا نجيب نصيحة : أنا أشجعك انك تغوى
العربيات اللى طول الأودة دى مرة ونص. ماليتك
تنتظم . وتعيش مرتاح .

نجيب — أنا أحتقر الكلام اللى بتقوله ده .

سامى — انت حر .

نجيب — وأحتقر الفلوس .

سامى — طيب . أورفوار . (يتحرك)

نجيب — رايح فين ؟

سامى — رايح لخطيتى فى أمر مهم . وراجع بعد ربع ساعة .
لأن عندى عيائين .

نجيب — (يتمدد كالريض) أنا عيان .

سامى — انت قاعد هنا . أنا رايح بقى . (يتجه الى الباب)

نجيب — رايح فين ؟

سامى — مش ضرورى أقول لك ألف مرة أنا رايح فين ،
لأن عقل حضرتك تايه النهار ده ! ..

نجيب — عندى هبوط فى القلب .

سامى — أحسن . نهارك سعيد . (يحاول الخروج)

نجيب - (ينهض على قدميه بسرعة ويصبح ه) أقف عندك .

رايح فين ؟ أنا بأقول لك عندي هبوط في القلب .

يا ابن الكلب ومضروب بالرصاص وحالتى خطيرة .

سامى - برده حازجع للرصاص ؟ !

نجيب - (فى صوت قاصف) شوف لى دوا فى الحال لهبوط

القلب وإلا وشرفك أطربأ العيادة عليك وعلى

العيانين

سامى - بقا دا صوت واحد عنده هبوط فى القلب ؟ !

نجيب - (ينزل صوته بسرعة الى طبقة منخفضة) انت يا سامى

ياخويه عندك دوا عجيب ضد هبوط القلب

سامى - إيه هو ؟

نجيب - (يترنم) ورقة بجنيه ياعزيزى ، جنيه مصرى والى

انجليزى ، ينحط كده فى الجيب يجمد القلب

ويطيب .

سامى - (ينظر اليه شذرا لحظة) بقا اسمع . يعنى يصنح تضيق من

وقتى ربيع ساعة فى اختراع الحكاية الطويلة العريضة

دى علشان كده ؟ ! .

نجيب - (يمد يده) لا أبدا . مسألة الحب حقيقية ولا شك
فيها . وبكره تشوف . أما الجنيه فده من زمان
موصوف لى فى الحالات الخطرة اللى زى دى ا
سامى - (يخرج محفظة نقوده) وشرفك أنا لازم أعزل حالا
من شقتى اللى فى قصر النيل . دا من يسكن فى عمارة
ساكن فيها أنت . . .

نجيب - (يخطف ورقة بجنيه من يد سامى) هات الله لا يجرمك
منى . ابقى ضيف على الحساب ا

سامى - (فى تهكم) حساب ؟ نهارك سعيد . . (يخرج)

نجيب - (يضم الورقة فى جيبه بعناية) سعيد مبارك يا أفندم . . .

(ثم يرتب هندامه) دلوقت بقا حيث اتنا اطمأنا على
مستقبلنا الباهر لمدة ٢٤ ساعة . يجب البحث عن
صاحبتنا اللى عينها ماركة « بروننج » . . (يخرج
علبة سجائره ويتناول - سجارة) (الباب الآخر للحجرة
يطرق)

نجيب - مين . . (الطرق يعود فيشتد) اسكت يا عيان الدكتور
جائ حالا (الطرق يشتد)

سيده - (من الخارج تصيح) أدخل والا لا

- نجيب - (في غير اكترات) لا
السيدة - (من الخارج) ليه ما أدخلش ؟
نجيب - كده !
السيدة - (صائحة) لازم أدخل !
نجيب - (وهو يشعل سيجارته) ادخلي
(الباب الأيمن يفتح وتظهر « فيفي » غادة مصرية
ارستقراطية رشيقة جميلة ذات أعين فتاكه وبمجرد أن يراها
نجيب يبفت ويهت وتسقط منه سيجارته من فمه)
فيفي - (فين الدكتور ؟) تبعت بعينها في أنحاء القاعة)
نجيب - (بلا حراك) ؟
فيفي - (تتأمل جموده في دهته) الدكتور فين ؟
نجيب - ...
فيفي - (الدكتور مش هنا من فضلك ؟)
نجيب - (كأنما كان يخاطب نفسه) مش ممكن .. (ثم يصحو
لنفسه ويلتفت بسرعة الى فيفي .) أفندم ...
فيفي - (فين هو ؟)
نجيب - (هو مين ؟)
فيفي - (في شيء من الصبر الناقد والحدة) الدكتور سامي
طبعاً .

- نجيب -- آه... طبعاً... ما تأخذنيش... أنا...
- فيفي -- (صائجة في ضيق عصبي فجائي) الدكتور سامي...
- نجيب -- (في الحال وقد خاف من صيحتها العصبية الفجائية)
ما اعرفوش .
- فيفي -- (صائجة في ضيق عصبي كذلك كالمرّة السابقة) أنت في
عيادته هنا ما تعرفوش ازاي ؟
- نجيب -- (في خوف كذلك كالمرّة السابقة) طيب أعرفه !
- فيفي -- (تتأمل لحظة من رأسه لقدمه كمن حسبه مخبولاً) يعني
حضرتك ما تقدرش تقول لي اذا كان الدكتور
موجود والا مش موجود ؟
- نجيب -- أقدر أقول لحضرتك .
- فيفي -- (في نهكم) امتي انشاء الله ؟
- نجيب -- حالا انشاء الله... بس...
- فيفي -- بس أيه ؟
- نجيب -- حلم حضرتك على شويه...
- فيفي -- (تنظر اليه في استغراب وضيق) أنا منتظرة...
- نجيب -- (يتالك) أيوه يا أفندم . حضرتك منتظرة.. مين.. ؟

فینی — (تنظر الیه نظرة نافذ الصبر الذی یحمل لآخر مرة) منتظرة

أعرف الدكتور سامی هنا والا لا؟

نجیب — (کن یفوق) آه... الدكتور سامی... آه یعنی

الدكتور سامی؟ آیوه یا أفندم أقدر أقول لحضرتك...

فینی — أظن المسألة مش محتاجة للوقت ده كله علشان

تقول لی الدكتور هنا والا مثل هنا؟

نجیب — تحبی أكون صریح شویه؟

فینی — تفضل

نجیب — أنا محتاج لخمس دقائق علشان أرجع لحالتي الطبيعية.

فینی — (تنظر الیه لحظة) یعنی دلوقت بأی حال ما تقدرش

تجاوینی؟

نجیب — مستحيل أقدر أجابو حضرتك على أى سؤال

بالشكل ده

فینی — بالشكل ده ازای؟

نجیب — ولو فیها رزالة غمضی عینك شویه.

فینی — (تنظر الیه شورا) یعنی ایه؟

نجیب — یعنی اعملی كده... (یغمض عینیه)

- فینی - مش فاهمه.
- نجیب - لا لازم تفهمی من فضلك .
- فینی - أفهم ايه ؟
- نجیب - تفهمی ان البروتنج فيه ست رصاصات بس . . .
وانطلقو كلهم خلاص . أكثر من كده يبقى
مترليوز . وروحي راجت من أول رصاصه . واذا
كنت سيادتك فاهمه اني بسبع أرواح أو اني معجون
بالأسمنت المسلح يبقى ظلم . وانت ما يخلصكيش .
والا أنا غلطان في الكلام ده (لحظة صت)
- فینی - (تنظر اليه من رأسه لقدمه كالرتاب في عقله) أنا كنت
فاكره الدكتور سامي حكيم باطني بس !
- نجیب - (فاما قصدهما) قصد حضرتك ايه بقا ؟
- فینی - ولا حاجه . أنا ما قلتش حاجه زياده عن كده .
- نجیب - أولا أنا مش عيان .
- فینی - طبعا مش يبطنك .
- نجیب - يعني سيادتك عايزه تقولي اني عيان بحاجه تانيه ؟
- فینی - أنا مش عايزه أقول حاجه أبداً . ولا فيش داعي لكده

بالمره لأنى مش جايه هنا دلوقت علشان أقول لك
انت عيان بايه .

نجيب - أمال حضرتك جايه هنا علشان ايه ؟

فيفى - جايه بالطبع لشيء ثانى . أقابل الدكتور سامى .

نجيب - لأسباب صحية طبعا ؟

فيفى - أيوه . وكان علشان .. أولا . اسمح لى أعرف ..

حضرتك مين هنا ؟

نجيب - حضرتى مين هنا ؟

فيفى - أيوه لو تسمح لى أعرف ...

نجيب - حاضر . أقول لحضرتك حالا .

فيفى - تفضل . منتظر ايه ؟

نجيب - (يخرج علبة سجايه ويقدمها الى فيفى) سجاره ؟

فيفى - (بلا حراك) مرسى . ما ادخنش

نجيب - برافو عملت طيب قوى . أنا ما احبش الست اللى تدخن .

(يتناول سيجارة ويضعها فى فيه)

فيفى - أنا كان ما احبش الراجل اللى يدخن .

نجيب - (فى حركة غريزية يتزع فى الحال السيجارة من فيه ويلقى

بها على الارض)

فيفي --- (في تهكم خفي) . لا مفيش لزوم . اشرب سيجارتك
أحسن !

نجيب --- (في قوة) لا مش ممكن . أنا مجنون ؟ ! خلاص من
اللحظة دي بطلت السجاير . انا مستعد أتعهد لك
وأقسم لك « بشرفي ، وحياة ... »

فيفي --- (في برود) وايه الداعي ؟ دا شيء ما يهمنيش .

نجيب --- (مصدوما) ما يهكميش اني ابطل السجاير ؟

فيفي --- بالتأكيد لا . يهمني في ايه ؟

نجيب --- مش لما ابطل السجاير صحتي تتحسن ؟

فيفي --- وأنا مالي ؟ دا شيء يهكم انت .

نجيب --- يهمني انا بس ؟ ما يهمش حد تاني أبدا ؟

فيفي --- ما اعرفش . انت بالطبع أدري بظروفك .

نجيب --- ان كان على ظروفي تأكدي انها ألين ظروف خلقتها

ربنا . أولا . أنا مقطوع من شجرة ولا فيش حد

يهتم ان كنت أدخن ولا انحرق .. ثانيا . أنا

ساكن لوحدى في « أبارتمان » في شارع قصر

النيل . . . ومحمد السفرجي سايني امبارح وطفش .

ووالدى الله يرحمه ويحسن اليه وكذلك والدتى .
الله يرحمها ويحسن اليها ، كانوا الاثني عشر من خيار
الناس وكان عندهم . . .

فيفى — (تقاطعه وتلتفت جهة الباب) من الأسف . عوضين

المرجى مش هنا علشان أسأله عن الدكتور سامى!

نجيب — (مصدوما) حضرتك متضايقه للدرجة دى من كلامى؟

فيفى — (فى تردد) لا انما بس أنا شايفه الوقت غير مناسب

علشان تحكى لى تاريخ حياتك .

نجيب — وأمتى أمان تشوفى الوقت مناسب علشان أبقى

أحكى لك تاريخ حياتى بالتفصيل؟

فيفى — واياه ضرورة انك تحكى لى تاريخ حياتك بتفصيل

أو من غير تفصيل؟

نجيب — مفيش ضرورة أبدأ؟

فيفى — بالتأ كيد مفيش ابدأ .

نجيب — ايه السبب؟

فيفى — طبعا . أولا أنا . . ما تأخذنيش . . ما اعرفكش

نجيب — (مصدوما) أشكرك .

- فيفي — لا ماتشكر نيش. دي الحقيقة.
- نجيب — صحيح دي الحقيقة .. لكن ...
- فيفي — لكن ايه ؟
- نجيب — لكن برده ما كنتش أحب انك أنت اللي
تذكريني بها.
- فيفي — انا مضطرة.
- نجيب — (يطرق في شبه اذعان وألم) طيب .
- فيفي — (تنظر اليه في صمت ثم تقول) انت مع ذلك لغاية
دلوقت ما فهمتنيش حضرتك تبقى مين هنا ؟
- نجيب — (في كآبة) وايد الفائدة ؟
- فيفي — بس أحب أعرف أنا بكم مين .
- نجيب — بتكلمى مين ؟ بتكلمى شخص مخلوق جديد لنج
من مدة ١٠ دقائق . مالوش ماضى يذكر . وفي
الغالب مالوش مستقبل . مالوش غير حاضر جميل
يدوم كان بالكثير ه دقائق.
- فيفي — مش فاهمه كلامك.
- نجيب — أحسن .

فيفى — بدى أعرف بس انت صفتك إيه فى العيادة؟

نجيب — ما ليش صفة .

فيفى — انت لك صلة بالدكتور سامى؟

نجيب — صاحبي .

فيفى — حكيم زيه طبعا؟

نجيب — (شاردا) طبعا .

فيفى — (باته) الطيور على أشكاها تقع .

نجيب — (كمن يخاطب نفسه) صحيح أنا وقعت .

فيفى — بالتأكيد .

نجيب — (يرفع رأسه ويلتفت إليها فجأة) إيش عرفك؟

فيفى — أنا أعرف انك ما وقعتش على الدكتور سامى هنا

إلا النهارده . لأنى سبق جيت له كثير فى

الوقت ده

نجيب — سبق جيتي كثير هنا قبل النهارده؟! . . . وأنا

كنت ساعتها فى أنهى داهية؟

فيفى — ما اعرفش .

نجيب — (صائحا) اسمحلى أقول لك انى أنا انسان يستحق

الضرب بعشرين أو خمسة وعشرين صر مه نضيفه!
فيفي -- ما اقدرش أقول لك بالضبط انت تستحق كام .
لكن كل اللي اقدر أتوله انك بتضيع وقتي بشكل
غريب . المهم في كل اللي فات الدكتور سامي هنا
والامش هنا ؟

نجيب -- (معدوم منفعل) الدكتور سامي مش موجود .
دا كل اللي أقدر أقوله . وعلشان ما اضيعش وقت
حضرتك بشكل غريب أقول لك أوفوار . .
أو . . آديو . . (يتحرك)

فيفي -- فيه عيانيين بره منتظرين الدكتور مين رايح
يشوفهم .

نجيب -- ما اعرفش

فيفي -- الدكتور سامي ما قالش مين يشوف العيانيين ؟

نجيب -- مفيش هنا عيانيين

فيفي -- فيه

نجيب -- مفيش

فيفي -- فيه

- نجيب — مفيش
فيفى — بقول لك فيه برة فى الصلاة وفى أود الانتظار .
نجيب — بقول لك مفيش هنا عيانين .
فيفى — طيب روح شوف بعينك برة!
نجيب — أنا ما أكذبش نفسى وأصدق عيني . مفيش فى
العبادة بل فى العالم كله دلوقت غير شخص واحد
بس اقدر أترف بصحيح انه عيان
فيفى — مين هو ؟
نجيب — المخلوق اللى واقف قدامك
فيفى — انت بتقول انك حكيم مش عيان
نجيب — عيان
فيفى — مش باين عليك
نجيب — هو يعنى علشان ما أكون عيان لازم يشيلونى
على نقالة ! .
فيفى — وعيان بأيه ؟
نجيب — وأنا مجنون أقولك أنا عيان بأيه ، وحاسس بأيه ؟
مستحيل أقول ، ولو شنقوتنى

- فیفی - لیه بقا ؟
نجیب - کده . ما أقولش أبدأ (لحظة صت)
فیفی - (تنظر الیه قلیلا) أحسن برده ما تقولش
نجیب - أنا نفسي ما يمكنش أقول
فیفی - آیوه ما تقولش
نجیب - ما أقولش أبدأ
فیفی - آیوه کده
نجیب - آیوه
فیفی - نرجع للموضوع . الدكتور سامی ما قالش حایر جمع
هنا امتی ؟
نجیب - أوكد لك لو قلت لك أنا عیان بأیه مستحيل تصدق
فیفی - قلت لك خلاص ما تقولش ، انتہینا
نجیب - عاشان کده انا ما يمكنش اقول
فیفی - ما تقولش
نجیب - آیوه ما أقولش
فیفی - آیوه کده

- نجيب — أيوه .
- فيفي — إذا كان الدكتور سامي مش راجع دلوقت أقدر أسيب
له كلمة . . . (جثة توضع يدها على ضربها متألمة) آه . . .
- نجيب — (في لهمة) مالك ؟
- فيفي — (تخرج مندِيلها وتضعه على فيها) سنتي .
- نجيب — (في اهتمام وقلق) بتوجعك ؟ ؟
- فيفي — قوى .
- نجيب — (يهرول في الحجرة كأنه يبحث عن شيء) فين . فين ؟ !
- فيفي — بتبحث عن ايه هناك . سنتي هنا (تشير الى فيها)
- نجيب — أيوه فاهم . أنا يبحث عن الدواء . فين الدواء . أولًا إيه
هو الدواء بالضبط ؟ على كل حال أنا لازم أشوف
لك طريقة . لاني مقدرش أشوفك متألمة من أي
شيء . . . فين الترجي ؟ فين الدكتور ؟ انت لازم لك
واحد دكتور حالا . . .
- فيفي — انت مش بتقول انك دكتور ؟
- نجيب — آه . أيوه . أيوه برضه . لكن حتى على فرض اني
دكتور ما اقدرش أعالجك إنت .

فيفى - ليه ؟

نجيب - مقدرش أقول لك ليه . المهم دلوقت إيه اللي فى امكانى

أعمله علشانك ؟ ! سنتك بتوجعك قوى ؟

فيفى - إيوه . دلوقت بس وجعتنى مش عارفه إيه ؟

نجيب - ورينى افتحى بقتك . فين السنة دى .. ؟ (تفتح فها)

فتظهر اسنانها) ؛ أولاً ده ضرر مش سنة . علشان

تصدقى انى دكتور . ثانياً فين هى الاسنان ؟ أنا مش

شايك غير صفين لولى من الغالى !! انت يلزمك

واحد جواهرجى مش واحد حكيم .

فيفى - لا . أرجوك . ضررسى بيوجعنى . شوف لى أى

علاج حالا ...

نجيب - علاج زى إيه ؟

فيفى - مش أنا طبعا اللي أقول لك .

نجيب - أصل أنا بس مش حكيم أسنان ...

فيفى - أمال حكيم إيه ؟

نجيب - (فى تردد) حكيم ... (ينظر الى عينيها الساحرتين)

عيون . إيوه أنا حكيم عيون ... لأنى أفهم فى

العيون ... ودرست العيون ... وقاسيت
من العيون ...

فيفى - لكن احنا دلوقت في الاسنان . واللى بيوجعنى
ضرسى .

نجيب - تا كدى ان ضرسك عزيز على قوى ... لكن بقا
مع الأسف ...

فيفى - اسمع يادكتور . أنا أعرف ان الألم دايمًا جاى من
عصب الضرس لما الواحد ياكل حاجة متلجة ...
ولذلك أى مسكن بسيط ..

نجيب - (بسرعة) أيوه مسكن . عليك نور . أهو ده الدواء
اللازم . بس كان تايه عن بالى . انما بقى المسكن
ده يعنى الواحد يتعاطاه سفوف .. والامعلقة شوربه
قبل الأكل . والا ايه .. ؟

فيفى - (تنظر اليه مليا) انت يظهر انك مش دكتور أبدًا .
نجيب - دكتور في العيون بس يا افندم .

فيفى - ولا حتى في العيون .

نجيب - الله يسأحك . المهم عندي ان أملك زول بأى

طريقة .. أنا مصرح لك : اشتميني . اضربيني . أنا
أفكر ان أحسن مسكن هو انك تشغلي نفسك عن
الأم بيهداتي ولعن أبو خاشي .. أظن دي أحسن طريقة .

فيفي — لكن ده مش علاج طبي .

نجيب — مش ضروري العلاج يكون طبي . مش أنا حكيم ..
لكن أوكد لك ان البلاوى الثقيلة ما تجيش إلا من
تحت راس الحكما .

فيفي — (فى سخرية) انت حكيم مدهش !
نجيب — جاز . . إنما الأصح انى بنى آدم متألم دلوقت بشكل
مدهش .

فيفي — مش باين عليك أبدأ .

نجيب — ما هو برده ده من سوء حظى .

فيفي — ومع ذلك كونك انت كان متألم داشى ما يهمنىش .

نجيب — وانت ايه اللى يبهمك ؟ !

فيفي — المهم عندى : حاجة تسكن ضرسى .

نجيب — ضرسك لسه بيوجعك ؟

فيفي — أبوه .

نجيب -- خالص ؟

فيفي -- خالص .

نجيب -- أحسن .

فيفي -- ازای أحسن ؟

نجيب -- علشان تانی مرة تحرمی الوقوف قدام جروبی تا کلی

« جلاس » ... توجعی ضررک وتموتی الناس !

فيفي -- (فی دهشة) وعرفت ازای انی أکلت جلاس قدام

جروبی ؟

نجيب -- حاجة بسیطة ...

فيفي -- لازم شففتی قبل دلوقت بشویه .

نجيب -- لا .

فيفي -- امال عرفت ازای ؟

نجيب -- ما تعرفیش انی اقدر اقرأ کل شیء فی فکرك وفي

ضميرك وفي قلبك ؟

فيفي -- حکيم روحانی حضرتک ؟

نجيب -- بالضبط ؟

فيفي -- (فی تهكم) أظن زی ما انت حکيم عيون ؟

- نجيب — أحسن شويه .
- فيفى — طيب إقرأ اللي فى ضميرى .
- نجيب — (يقف وقفة صناعية وينظر اليها مليا ثم يتنحج) فى ضميرك
انى شخص ضيع وقتك بشكل غريب .
- فيفى — كداب .
- نجيب — (فى فرح) صحيح ؟
- فيفى — ما تسألنيش . العالم الروحاني الحقيقي ما يسألش
الزبون .
- نجيب — بدى اطمئن .
- فيفى — مش من وظيفتك انك انت اللي تطمئن يا حضرة
الساحر العجيب ؟
- نجيب — أوكد لك انك ألطف انسانة شفتها .
- فيفى — أنا مش عاوزه تقرأ لى اللي فى ضميرك انت !
- نجيب — عندك حق . اللي فى ضميرى انا مفهوم طبعاً .
وسحرك انت بس اللي قدر يكشف ضميرى .
- فيفى — احنا فى سحرك انت ؟ !
- نجيب — (فرحاً) وأنا لى سحر ؟ !

- فيفى — انت اللى بتقول .
نجيب — (متذكرا) آه...
فيفى — قرئت ايه كان فى فكرى ؟
نجيب — (ناظرا اليها مليا) انت مدهشة !
فيفى — دا شىء مش فى فكرى طبعا .
نجيب — انت مش بسيطة أبدا .
فيفى — ومين بسيط فى الزمن ده ؟
نجيب — أنا بقراً فى قلبك كلام يخوف .
فيفى — يخوف ليه ؟ ويخوف مين ؟
نجيب — يخوفنى .
فيفى — يخوفك انت ؟ . انت كل حاجة تحشر نفسك فيها
حتى قلبي ؟
نجيب — ياريت أقدر أنحشر فى قلبك !
فيفى — (بتبسم) ايه بقى اللى خوفك ؟
نجيب — أولا بصيت فى قلبك لقيته فاضى . أفضى من جيب
نجيب من قبل عشر دقائق !
فيفى — ككذاب .

نجيب — ازای؟ قلبك مش فاضى؟

فيفى — لا ..

نجيب — مشغول؟

فيفى — طبعا .

نجيب — (فى فرح) كويس . تسمحنى بقا أسألك سؤال واحد؟

فيفى — (فى تقطيب) أنا عازقة السؤال الواحد ده وما
أسمحش به أبدا .

نجيب — لا . أعملى معروف أنا محسوبك ، متجيش لغاية

النقطة الحساسة دى وتعاكسنى . كلمة واحدة يتوقف
عليها مستقبل حياتى .

فيفى — كلمة ايه؟

نجيب — مين هو .. ؟ ... مين هو السعيد اللى ... ؟

فيفى — مستحيل . يظهر انى تساهات معك فى الكلام

أكثر من اللازم .. عاوزكان تعرف أسرارى

الخصوصية؟ !

نجيب — وماله ! انت أولا أجمل وأذكى وأشجع آنسة

مصرية عرفتها .

فيفى — مش عاوزه تقرىظ من فضلك .

نجيب - تقریظ؟ دی حقائق . أنا عاوز أقول لك انك
زى ما ظهر لى واحده مش بسيطة من بتوع زمان.
انت واحده فاهمه كل شىء فى الدنيا . تعليم وتهذيب
وذكاء . بالطبع دى اكبر قوة وأعظم سلاح فى
يد الست تقدر تعيش به فى وسط العفاريات . ايه
اللى يهم واحدة زيك دلوقت . انها تكون صريحة
مع واحد زى !!

فيفى - ما تبلفنيش من فضلك .

نجيب - مش بلف أبداً والله .

فيفى - عاوزنى اكون صريحة فى ايه ؟

نجيب - أولا أنا مش عاوز أعرف انت مين . . ولا ماركة

أتموبيلك ايه . . ولا ساكنة فين !

فيفى - امال عاوز ايه !

نجيب - عاوز اعرف بكل صراحة . . . فاهمه بكل صراحة

مين هو المخلوق اللى شاغل قلبك !

فيفى - واحد من الناس .

نجيب - مفهوم . قصدى مين هو يعنى ؟

فيفى - وايه يهملك ان كان زيد والا عمرو !

- نجيب — (في تردد) هو موجود ؟
فيفي — طبعاً على قيد الحياة .
- نجيب — (متردد) لأ . قصدي موجود ... هنا ؟ ... !
فيفي — أيوه موجود في مصر .
- نجيب — (خائفاً) قصدي كان يعني ... بس جاوييني
بالصراحة . فاهمه بكل صراحة : هو موجود هنا في
الأودة دي والا لأ ؟
- فيفي — (مندهشة) سؤال غريب !
نجيب — عاوز الصراحة ، هو موجود قدمك دلوقت والا لأ ؟
- فيفي — طبعاً لأ .
نجيب — (يحاول الهدوء) آه ...
- فيفي — (تلاحظ تغيره) مالك ؟
نجيب — لأ ما فيش حاجة أبدأ . يعني قصدك أنه واحد
تاني ... مش موجود هنا ؟
- فيفي — طبعاً .
نجيب — (يطرق) آه ...
- فيفي — (تنظر اليه) زعلت ؟

- نجيب — (يرفع رأسه) لا ما فيش زعل أبدا .
فيني — أظن أنا جاوبتك بصراحة زى أنت ما طلبت تمام ؟
نجيب — (في اطراق) أيوه تمام . مرسى .
فيني — أقدر أقول لك كان إذا كنت عاوز إيضاح أكثر
من كده انه خطيبي .
نجيب — مش مهم .
فيني — وانه حكيم زيك لكن يمكن يعرف صنعتته أحسن
منك شويه .
نجيب — طبعاً .
فيني — أقدر أقول لك .. انك يمكن تعرفه .
نجيب — جاز .
فيني — وانه ربما يكون صاحبك .
نجيب — زى بعضه .
فيني — تحب تستعلم عن حاجة ثانية كان ؟
نجيب — لا خلاص متشكر . ده كل اللي أنا كنت عاوز أعرفه .
نهارك سعيد (ينحني ويتناول سيجارته التي القاهما على
الارض ويمسحها في كفه ويضعها في فمه ، صمت طويل ...)

- نجيب - نه ارك سعيد (يتجه الى الباب ليخرج)
فيفي - (تنظر اليه باسمه وعندئذ تتحرك نحو الباب الاخر) يا عوضين !
(تخرج)
- نجيب - (لا يزال يفكر) ...
سامي - (داخلا من الباب الواقف امامه نجيب) انت لسه هنا .
لسه هنا ومعاك جنيه ؟ ا ما رحتش ليه تبحت عن
صاحبتك ؟
- نجيب - (ينظر اليه ولا يجيب) ...
سامي - (يترك نجيب ويهرع باحنا) فيفي ... (لنجيب) فيفي
خطيبتى هنا ماشفتهاش ؟
- فيفي - (تدخل) سامي !
سامي - انا يظهر رحى لك من هنا وانت جيتى من هنا .
تعالى اولاً لما أقدم لك نجيب صاحبي وصديقي
وجارى فى السكن (يقدم أحدهما للاخر) خطيبتى ..
- فيفي - (بتهم) تشرقنا .
نجيب - (لا يجسر على النظر اليها) تشرقنا يا اقدم .
فيفي - حضرته طبعا حكيم زيك يا سامي .

- سامى - ابداده موظف مهم .
- فيفى - (انجيب فى تهم) كده ؟ !
- سامى - وفضلا عن ذلك معروف فى كل مكان انه من أظرف شخصيات البلد ، ما يغركيش انه واقف كده مبلم زى اللى خطفوا محفظته . ده بس علشان حصلت له حادثه من مدة نصف ساعة .
- فيفى - حادثه ايه لا سمح الله ؟
- سامى - شاف واحده فى اتوموبيل قدام جروبي بتاكل جلاس ...
- نجيب - (بسرعة) قصده حادثه اتوموبيل . كان حا يحصل تصادم .
- سامى - بلاش كذب يا نجيب .
- فيفى - وجرى ايه ؟ .
- سامى - مافيش تصادم ولا حاجة الحكاية كلها انه بيحب ..
- نجيب - (فى حيرة) كلام ايه ده يا سامى ؟
- سامى - فيفى «سبوز» ماتخافش . هو الحب عيب؟ مش كده يا فيفى ؟ بدليل اننا احنا حيننا بعض .

فيفى — طبعا ياسامى.

نجيب — (يدير وجهه ويتحرك) نهاركم سعيد!

سامى — الله انتظر. قبل لنا نويت على إيه. احنا لازم

نساعذك ونشوف لك طريقة. مادمت أول ماشفتها

اتلخمت وغرقت فى شبر ميه ولا عرقش هي مين

ولا ساكنة فين؟ فأظن مش لطيفة اننا نسيك كده

وحلان لشوشتك.

نجيب — أرجوك ياسامى تريح نفسك من جهتي!.

سامى — انت مكسوف تقول انك بتحب؟

نجيب — وبعدين معاك؟!

سامى — انت مش قايل لى أبلغ عن وفاتك لأن عينيها قتلتك

ومت خلاص وانضربت بالرصاص ولا تقدرش

تعيش من غيرها. حصل والا ما حصلش؟

فيفى — للدرجة دى؟

نجيب — كلام.

فيفى — طبعا كلام!

نجيب — والدليل على كده اني عايش أهوه كويس بصحة

جيدة اربعة وعشرين قيراط !

صى — دا من حسن الحظ .

امى — (وهو يخلع جاتته ويرتدى معطف العمل) ما تصدقيش!..
شوفى وشه أصفر ازاي . أنا أراهن ان ما كان
وزنه نزل النص .

نجيب — (صائحا) يا سيدى مالـكـش دعوى بوزنى اعـمـل
معروف ! انت حد مساطك على النهارده ؟ ! !

سامى — شوف انت بقيت عصبي ازاي ! ما يصحش توصل
حالتك للدرجة دى وأسيبك .

نجيب — وعاوزمنى ايه بقا انت دلوقت ؟

سامى — أشوف لك طريقة حالا . أنا كنت الاول مستعجل
ودلوقت فضيت لك . اسمع : أحسن حل انك تروح
«جروبي» وتسال ...

نجيب — أسأل عن ايه ؟

سامى — عن الست صاحبة الاتوموبيل الفخم اللي كانت
بتاكل جلاس يمكن تكوب معروقة هناك .

- نجيب — طيب وان عرفتها يجرى ايه فى الدنيا؟ ايه اللي راح
يتغير فى حياتى؟
- سامى — ايه التغفيل ده؟ ان عرفتها تبقى خلاص المسألة
انحلت، تبقى نجحت يا عزيزى واهنيك واستحق
منك الحلاوة.. مش كده والا ايه يافنى؟
- فبنى — (مامة) بالتأكيد!
- نجيب — (خافتا وهم ينظر اليها) شىء غريب!
- سامى — يالله طيران على جرونى . ماتضيعش دقيقة واحدة.
- نجيب — (يتحرك) حاضر: نهاركم سعيد .
- سامى — (بسرعة) انتظر يا نجيب (يدنو منه ويهمس اليه)
- اسمع .. انت مش لازم لك كان فلوس؟
- نجيب — لا .
- سامى — عجيبه! لأول مرة فى حياتك الفلوس مش
لازماك!
- نجيب — (يخرج الجنيه من جيبه) خد ده كان مش لازمى .
- سامى — (فى دهشة) مش ممكن!
- نجيب — (يمطيه الجنيه) لأول مرة فى حياتى أسلف فلوس!

- سامى - قصدك : ترد السلف .
- نجيب - الاثنين واحد . نهارك سعيد .
- سامى - اسمع ورايح تقابلها ازاي وانت مامعكش قرش ؟
- نجيب - (صائحا) أقابل مين ؟ مين هي اللي أقابلها ؟
- ما تقولش الكلام ده بقا احسن ما يحصلكش طيب . انا مش مقابل حدأبدأ . سيبنى أعمل معروف بقا خلىنى أروح لأشغالى . أنا واحد عندى شغل فى الوزارة وانت النهار ده ضيعت وقتى النفيس !
- سامى - وقتك النفيس (بلغت الى فىنى) بقول لك أصبح عصبي . ما كانش كده ابدأ .
- فىنى - (لنجيب فى تهكم خي) اشرب قنجان ينسون دافى يا نجيب بك أعصابك تستريح .
- نجيب - (ينعق) أشكرك !
- سامى - صحيح . الينسون الدافى ده مدهش .
- نجيب - حاضر ! حاشرب ينسون دافى .
- فىنى - وحمام سخن قبل النوم .
- نجيب - حاضر .

- سامى - صحيح الحمام الساخن قبل النوم مدهش .
- نجيب - آخذ حمام سخن !
- فيفي - وخذ بعد كده . .
- نجيب - إيه تانى ، دش بارد كان ؟ اعملوا معروف كفاية .
- اسمحووا لى أروح لحالى .
- فيفي - « الباكار ، بتاعتى تحت تقدر توصلك .
- نجيب - ممنون ، أنا ما اركبش لا باكار ولا دوكار .
- سامى - سيبيه يمشى على رجليه . ودا وش نعمة . . .
- فيفي - علشان أظن البك مستعجل . احنا يظهر ضيعنا
- وقتك النفيس يا نجيب بك ؟ !
- نجيب - بشكل غريب !
- سامى - (يلتفت اليه مقطبا) ازاي ؟
- نجيب - (صانحا منفجرا) أقسم بالله العظيم لو تكلمت كلمة
- زيادة ، لأطرباً عليك العيادة وزى ما ترسى . أنا
- لا قابلت ست فى جروبي بتأكل جلاس ولا سم
- هارى . . والحكاية ملفقة من أولها لآخرها علشان
- الطش منك جنيه . ولو أسمعتك تجيب لى سيرة الست
- دى مرة ثانية أنا أضربك بالرصاص !

- سامي — الرصاص اياه اللي انضربت به النهارده ؟ !
نجيب — أنا باكلبك جد . وأنت الجاني على نفسك .
سامي — انت جري لك إيه يا نجيب . ؟
نجيب — أنا متأسف أكلبك باللهجة دي قدام الست لكن
أنا مضطر (لغبني) ما تأخذنيش !
فيقي (باسه) خد راحتك في الكلام .
سامي — معذور ! أنا مش قادر أفهم يا نجيب ازاي تياس
للدرجة دي ؟ احنا نبجث لك عنها ياسيدي من تحت
الارض . بس اهدأ وروق دمك وكون مطمئن .
دي مسألة في غاية البساطة . أنا أتهد لك وأكون
مستول ...
نجيب — أصل المصيبة انك ما بتفهمش عربي أبدأ . دماغك
متركة شمال . أعمل لك إيه ؟ الأمر وما فيه ياسيدنا
الافندي ان دي حكاية ما لهاش أساس بالمره . فهمت
كلامي ؟ . يعني لا كان فيه ست ولا جلاس ولا
أتوموبيل .
سامي — مفهوم . لأنك ضيعت ده كله بلخمتك .
نجيب — ما فيش فائدة !

- سامى -- لأنك انت لما تحب ...
- نجيب -- (مقاطعا) قلت لحضرتك مافيش حب !
- سامى -- كده؟ !
- نجيب -- تصدق ما تصدقش انت حر . أولا أنا ما أقدرش
أدخل جروبي لأن مرسيل اللي واقف على البار له
فى ذمتى ٢٠ جنيه من حساب وغيره ...
- سامى -- حتى البارمان اللي واقف على البار ؟ . والله أنت
لو دخلك الجنة برده تستلف من سيدنا رضوان
اللى واقف على الباب !
- نجيب -- ما حدش له بي شأن .
- فنى -- طبعا ما اناش شأن أبداً .
- نجيب -- على كل حال . يكون فى معلومكم . انى ما أحبش
الست اللي كانت بتاكل جلاس قدام جروبي .
ما أحبهاش . أنا حرها أحبهاش أبداً . حد شريكى؟
بالعكس أنا اكرها دلوقت زى ما اكره فاتورة
الحساب ! فاهمين . . ما احبهاش . . ما احبهاش
اقطع دراعى ان ما كان دهو الحب .
- سامى --
- فنى -- (ضاحكة و تقول بصوت خافت) مسكين يا نجيب !

الفصل الثاني

الشقة التي يسكنها نجيب بشارع قصر النيل :
صالون بسيط حسن الذوق . باب في الصدر
وباب في الجهة اليمنى صغير وباب بلكون في
الجهة اليسرى . منضدة كبيرة على شكل
صندوق في وسط الصالون . وعليها غطاء
فلا يدرك الرائي لاول وهلة أنها صندوق .
تليفون على منضدة اخرى صغيرة .
وجراموفون على منضدة ثالثة كذلك .
مرآة في الحائط

(أمام المرآة بالقميس والبنطلون يربط الكراواته . يدق
جرس باب الشقة . . . فيتمض نجيب ويسرع الى وسط
الصالون) . جرس الخطر . ! (ثم يتجه الى المنضدة التي
كالصندوق ويرفع غطاءها فيفتح الصندوق فيدخل فيه
ويتمدد وينلق عليه الغطاء . وعندئذ يدخل عبد الله من
باب الصدر) .

(في يده ورقة) سي نجيب بك ! ياسي نجيب بك
اظهر جنابك وبان ، وعليك الأمان ! مفيش
حد من اياهم . دا أنا عبد الله البواب .

نجيب —

عبد الله —

- نجيب — (يرفع الغطاء ويظهر من الصندوق ويظل لحظة يرى
عبد الله بنظرات شذراء ثم ينفجر) انت مش عبد الله
البواب ، انت عبد الله الجحش . . . حضرتك
مش ناوى تبطل اللعب فى جرس الخطر ؟
عبد الله — نسيت .
نجيب — يعجبك كده تخلى دمي يهرب من غير مناسبة ؟
عبد الله — حصل خير .
نجيب — (يرتدى على القعد) اجرى بقى شوف لى كباية لمون
بالثلج .
عبد الله — وفين هو اللمون والثلج ؟
نجيب — تصرف ياأخى . بس شاطر تعكر مزاجى . . شىء
يجزن .
عبد الله — هات جنابك قرش نشترى به .
نجيب — بتقول إيه ؟
عبد الله — قرش .
نجيب — اسحب كمتك بسرعة .
عبد الله — مافيش حد دلوقت راضى بيع لنا شكك .

نجيب - طيب خلاص اسكت . صرفنا نظر . لكن الحق
مش عليك . الحق على أنا اللي أسكن في عمارة
فيها بواب تن زى حضرتك . . طول عمر
البوايين تسلف السكان وأنت مش راضى تطلع
من جييك قرش واحد نجيب به ثلج .

عبد الله - تصدق بالله ياسى نجيب بك ؟

نجيب - مصدق بالله انك بارد .

عبد الله - أبدا . وشرفك لو تعرف العذر . دا أنا مخصوص
طالع لجنابك علشان أطلب . .

نجيب - لا . أقصر الشر . تطلب ؟ إيه أنت انهيت ؟
اسكت بقا خلاص . لا تطلب منى ولا أطلب منك .
خلينا كده حافظين مرا كزنا .

عبد الله - أنا على كل حال ما أنساش فضلك على .

نجيب - أيوه كده اتصلح اعمل معروف (يتناول الجاكته من
على مقعد ويلبسها)

عبد الله - بس . . .

نجيب - (يقاطعه) لا ، فى عرضك ما فيش بس ا ما تبقاش

زى القبط تاكل وتنكر . أنت لسه امبارح واصلك
منى نص ريال .

عبد الله — خليم النهارده ريال .

نجيب — واجيب لك مين ؟ هو انت ربنا مشيعك دلوقت
علشان تنسب فى نكدى ؟

عبد الله — دا أنا يا بيه حاش عنك بلاوى كتير .

نجيب — طيب ما تحوش نفسك عنى شويه دلوقت .

عبد الله — والله ان ما كنت أنا موجود تحت لكان أصحاب
الديون طلوعوا هر بدوا البيت . ولا كان نفع فيهم
جرس خطر ولا صندوق ولا أى حيلة من حيلة
دى ! . دا وكيل صاحب الملك كل يوم والثانى عايز
يقابلك علشان أجرة الشقة المتأخرة وأنا أوزعه
وأقول له أنك مسافر . وكل ما حد غريب يسأل عن
حضرتك أقول له مش موجود . أما فكر جنابك أنا
قاعد تحت أقشر بصل ؟

نجيب — كل ده كويس لكن بقا ..

عبد الله — لكن كله من قلة البخت .

نجيب -- انت لآخر قليل البخت؟

عبدالله -- ربنا أعلم بحالي .

نجيب -- علشان عاوز نص ريال؟

عبدالله -- نص ريال . ربع ريال . اللي يطالع من ذمتك .

نجيب -- انت فاهم ذمتي دي جراب أطلع منه أنصاف ريالات

وأربع ريالات؟

عبدالله -- بقي ما فيش النهارده جبر خاطر؟

نجيب -- ربنا أعلم بحالي .

عبدالله -- النهارده أول الشهر .

نجيب -- أول الشهر كان الصبح .

عبدالله -- ودلوقت؟

نجيب -- دلوقت اسمه آخر الشهر .

عبدالله -- كده بالعجل؟

نجيب -- النتيجة الرسمية بتاعتى كده . أول الشهر يبتدىء

من الساعة ٩ صباحاً لغاية الساعة ١١ والدقيقة ٥٥

يعنى على ما يضرب مدفع الضهر أكون شطبت .

طبعاً . أنت فاكر ايه؟ اخنا ما عندناش فلوس

تبات لثاني يوم .

عبد الله — على كده جنابك رايح تعمل إيه في دي ؟
(يقدم الورقة التي معه)

نجيب — ايه دي ؟

عبد الله — فاتورة حساب

نجيب — هس! ما تسمعنيش كليه حساب، إياك تنطق الكلمة دي
في بيتي، أنا مؤمن على حياتي ضد الكلمة دي .

عبد الله — دا خريستو البقال .

نجيب — ما اعرفوش .

عبد الله — عاوز يقبض .

نجيب — قل له بلاش عبط .

عبد الله — له ٦٥٠ قرش استجرار الشهر اللي فات . منهم

٣٠٠ قرش سلفة نقدية و ٢٠٠ قرش باقى الشهر اللي

قبله و ١٥٠ قرش . . .

نجيب — اسبكت أعمل معروف . ما فيش فائدة . ربنا

خلق لى طبل ودان ما تلتقطش الحساب .

عبد الله — الخواجه حلف عمره ما يشكك حضرتك .

نجيب — حلف يايه ؟

عبد الله — حلف بدينه قدام بوابين الحتة ...

نجيب — أنه ما يشككنيش ؟

عبد الله — ابدأ .

نجيب — (يعنى) قال ايه حلف ما يشككنيش . . قال ايه

حلف . . (فجأة ينفجر فى غضب) أقسم بالله الذى

خلق السلف نعمة للناس انى لا اتعامل مع الوغد

خريستو ده لاشكك ولا نقدية . خلاص . مبسوط ؟

عبد الله — و نجيب لوازنا منين ؟

نجيب — شوف بقال تانى . هو بقى ما فيش فى مصر غير

خريستو ؟

عبد الله — دافيش غيره . كافة بقالين الحتة عرفتنا . بقى لئاسنة

كل شهرين نغير بقال .

نجيب — بقى احنا خلصنا بقالين قصر النيل كلهم ؟

عبد الله — خلصناهم كلهم ودوبناهم فى عرق العافية .

نجيب — ما فيش بقال فتح جديد ؟

عبد الله — ابدأ . أنا واخذ بالى طيب من كل دكان يفتح جديد

- نجيب -- شىء يجنن ! والعمل ايه بقى دلوقت ؟
- عبدالله -- أحسن طريقة ندفع لخريستو قرشين من أصل المطلوب ونرجع له .
- نجيب -- نرجع له . مش ممكن ... أنا حلفت خلاص . ما يمكنش .
- عبدالله -- خريستو برده مهاود ابن حلال أحسن من غيره .
- نجيب -- انت مجنون . مستحيل . وقع منى يمينا ..
- عبدالله -- ان الله غفور رحيم .
- نجيب -- حتى اليمين نقعد نبعزق فيه .. ؟
- عبدالله -- معلش برده أحسن من البهدلة تراضيه ونرجع له .
- نجيب -- انا لله وانا لخريستو راجعون .
- عبدالله -- ندفع له النهارده ٢٠٠ قرش .
- نجيب -- ٢٠٠ إيه ؟ ..
- عبدالله -- ان ما كانش النهارده يكون بكرة .
- نجيب -- وان ما كانش بكرة ؟
- عبدالله -- يكون بعده .
- نجيب -- دا كلام جميل . لما انت تعرف تسمعنى الكلام الحلوده ساكت ليه من الصبح ! سبحان الله !

انزل بقى خلىنى آخذ ه دقائق استراحة .

عبد الله — (فى تردد) فيه موضوع تانى .

نجيب — موضوع مفرح من فضلك ؟

عبد الله — مفرح قوى .

نجيب — خير ، قل بسرعة .

عبد الله — الربع ريال لازمى ضرورى .

نجيب — (شزرا) دا الموضوع المفرح قوى ؟

عبد الله — ما هو اصل أنا كنت الأول طالب من جنابك نص

ريال ، لكن بقى . .

نجيب — لكن بقى مراعاة للحالة الحاضرة عملت لى تنزيل

. ه فى المائة . مفهوم .

عبد الله — أنا قلبى دائما على جنابك .

نجيب — اشكرك على احساساتك .

عبد الله — (يشير الى جاكته نجيب) أهرش جنابك فى جيب

الجاكته .

نجيب — (ينهض ويخلع جاكته ويقذف بها اليه) خد اهرش فيها

بمعرفتك .

- عبد الله — (يتلقاها ويبعث في جيوبها جميعها) اللي ما فيها
برغوت نقدية !
- نجيب — (جالسا) علشان تصدق .
- عبد الله — (ينظر اليه في ارتياب) أمال جنابك نازل بره
دلوقت ازاي ؟
- نجيب — ومين قال لك اني نازل ؟
- عبد الله — جنابك مش نازل النهارده ؟
- نجيب — انزل ازاي ؟ عينك كلها نظر .
- عبد الله — يعني جنابك حاتفضل محبوس هنا ؟
- نجيب — قسمتي .
- عبد الله — لحد امتي .
- نجيب — لحد ما تسلفني انت ربع ريال .
- عبد الله — كويس ! لأمش ضروري بقى نزول جنابك . اقعد
لحد ما يفرجها الكريم من ناحية ثمانية (جرس التليفون
يدق) اياك ده الفرج .
- نجيب — (بلا حراك) عشم ابليس في الجنة .
- عبد الله — مين عارف ؟

نجيب — مش منظور أن مدير البنك الأهل يطلبنى فى
التليفون علشان يقول لى أمرنا لك بخمسين جنيهه!
على كل حال روح انت شوف مين .

عبد الله — (يتجة الى التليفون) ياسيدنا الحسين .

نجيب — ان كان واحد من اياهم ارمى السماعة على طول !

عبد الله — (يرفم السماعة) آلو . . آلو . . مين نجيب بك

حاضر (يلتفت الى نجيب) دى واحدة ست عاوزه
حضرتك .

نجيب — (ينتفض) ست . . (ينهض ويهرع الى التليفون) آلو .

افندم . . آه . . هو انت ياسوسو ؟ نعم عاوزة

ايه ؟ . ما بظهرش ؟ طبعاً فيه سبب مهم . . لأمش

زعلان منك . أنا زعلان من نفسى . لأمش نازل

النهارده . . لأنى منحاش . . منحاش فى البيت .

اللى حايشنى ؟ سبب مهم . (يبعد فبه عن البوق

ويخاطب عبد الله) أقول لها على السبب ياسى

عبد الله (يعود الى التليفون) لآ ما أقدرش

النهارده . . متأسف . . اورفوار . . (يضع السماعة

ويجلس وهو يقول لعبد الله (صدقت ؟ قلت لك د .
مش مدير البنك الأهللى تقول لى لآ . . مافيش
فايدة .

عبد الله — (بعد لحظة صمت) بقى مافيش مع حضرتك ربع ريال؟
نجيب - (فى صبر عجيب) ان كان مع حضرتى ٣ صاغ كنت
نزلت . عاوز أفهمك أكثر من كده ؟

عبد الله — (فى لحظة تفكير) جنابك برده تقدر تجبر بخاطرى .
نجيب — (فى اهتمام) ازاي بقايا شاطر؟

عبد الله — المطبخ فيه كروانه نحاس تساوى لها نصف ريال .
نجيب — بس كده ؟

عبد الله — وفيه كمان لحوق كويس يجيب له ٧ قروش صاغ .
نجيب — كويس . وأنا آكل فى ايه ؟
عبد الله — فى اللوكانده .

نجيب . — ياسيدى . . ياسيدى !!
عبد الله — محمد السفرجى طفش . ومين اللى رايح يطبخ
لجنابك . . مافيش غير اللوكانده .

نجيب — (فى تهكم خفى) الكوتنتنتال !

عبد الله — اللي تستحسنها .

نجيب — تعجبني .

عبد الله — وأكل اللوكاندة على كل حال أحسن من تلكليك

محمد السفرجي اللي يقرف الكاب .

نجيب — طبعاً . لكن بقي يافصيح اللوكاندة دي بلاش

والا بفلوس ؟

عبد الله — شكك لحد أول الشهر

نجيب — يا مسكين يا أول الشهر . . أول الشهر ده لو كان

جمل ، كان زمانه وقع من طوله مغشياً عليه !

عبد الله — وإيه الرأي بقي ياسي نجيب بك ؟

نجيب — اللي تشوفه جنابك (جرس التليفون يدق)

عبد الله — التليفون !

نجيب — تعالى شوف مين .

عبد الله — (بمسك السماعة) آلو . . مين ؟ (لنجيب) واحده

ست برده .

نجيب — عاوزه إيه دي كان ؟ . هات وريني (يأخذ السماعة) آلو .

مين ؟ حسنية ؟ أفندم . . عاوزانى ضرورى ؟
مش ممكن . ما أقدرش أنزل النهارده . سبب
مهم . منحاش . . أيوه منحاش . . برده لازم
أجيك حالا فى تاكسى ؟ طيب انتظرى على
التليفون لحظة (يلتفت الى عبد الله) نصف ريال
سلف يا عبد الله بك !

عبد الله - مين ؟

نجيب - إبحث فى أى حته . . لازمى ضرورى اعمل
معروف .

عبد الله - تعمل به ايه جنابك ؟

نجيب - أجرة تاكسى يا مغفل .

عبد الله - أنا ورايا شغل تحت مش فاضى . (يتحرك للانصراف)

نجيب - (يمسح نحوه) ما أنا برده عارفك ندل خسع !

(وفى الحال يتجه الى البلكون فى الجهة اليسرى ويقف

يبابه ويرفع رأسه الى أعلى ويصفر) يا مصطفى . . .

يا مصطفى . . سيدك سامى لسه ما رجعتش من

العبادة ؟ لسه ؟ . طيب احذف لى حالا نص

ريال وحياة أبوك . مافيش ازاي ؟ نص ريال
واحد لا غير يا دون . ما تعطلنيش .
انص على اللي عملكم تخدامين . (يدخل يائسا) شيء
يجن . (يمسك السماعة) آلو . . اسمعي يا حسنية . .
مافيش فايده . أبداً . تعالى انت بتاكسي .
مستحيل ؟ طيب يا عزيزتي أوقفواري . (يضع السماعة
في الحال)

عبد الله - خليك جنابك في بيتك برده أحسن !

نجيب - (في نظرة شزراء) أحسن في ايه ؟

عبد الله - جنابك كنت حاتفك للتا كسي النصر ريال اللي
احنا لسه مش عارفين نعتري عليه !

نجيب - طيب أسحكت . مش عاوز منك كلام ! قسا بالله
العظيم ما تنطق كلمة واحدة زيادة الا أقوم أأكلك
علقة تساوي ٣٠ قرش !

عبد الله - ٣٠ قرش ! دي ولا أكلة الحاتي الكبابجي !
طيب قابل ، بس ادفعهم .

نجيب - تفضل انزل . وخدها من قصيرها . الا أنا دلوقت

العفاريت بتاعب قدامى . .

عبد الله — لأ ربنا يستر . (يشير بالسلام ويخرج)

نجيب — (يرتدى عى للقميد) ما فيش نزول خلاص . أنا لازم

أعود نفسى على الوحدة وأعمل زى غاندى واحترق

العالم ده كاه اللى ماشى بالفلوس . سوسو تحبني علشان

الفلوس . حسنية عاوزانى بالفلوس . آدى الحياة

كلها . فيها ايه غير كده ؟ وكذاب اللى يقول فيه

حاجة اسمها عواطف حاف عند مخاليسق الله

المصنوعين من وحل وطين . .

سامى — (يدخل فى اندفاع واهتمام) نجيب ؟ . .

نجيب — نعم . مالك عاوز ايه انت لآخر ؟ . .

سامى — أنا . . أنا . .

نجيب — انطق أمان .

سامى — أنا وقعت من السما وانت تعلقفتنى . .

نجيب — امتى ده ؟

سامى — دلوقت .

نجيب — أبدأ انت لو كنت وقعت دلوقت من السما كنت

سبتك تنكسر رقيبتك .

س - ما ترضاش . أنا عارف قلبك وأخلاقك .

نجيب - الغرض . بالاختصار انت عاوز ايه دلوقت ؟

سامي - ما تكلمنيش باللهجة دي يا نجيب . شجعني شويه ..

نجيب - أشجعك يعني ايه ؟ شجع نفسك وتكلم انت وقول

اللى عاوز تقوله .

سامي - أنا . . . انت عارف اني خاطب فيني . . .

نجيب - عارف .

سامي - طبعا .. لسه مش خطوة رسمية لغاية دلوقت

انما ..

نجيب - زى بعضه .

سامي - لأ مش زى بعضه .

نجيب - المهم انكم بتحبوا بعض .

سامي - مش كفاية . الخطوة المهمة والعقبة الصعبة أهلها .

فيقي أولا وارثه النهارده ومتوفر لها في المجلس الحسيني

أكثر من ١٢ ألف جنيه . وعائلتها كبيرة

معروفة وما اقدرش أقول لك ان كانوا يرضوا بواحد

زبي والا لا . خصوصا أنا سمعت ان أهلها مشرطين
مهر لا يقل عن ٨٠٠ جنيه وشبكة ٣٠٠ جنيه .
يعنى واحدة زى دى تتكلف لها حوالى ١١٠٠
جنيه .

- نجيب - وما له انت لك فى البنك مبلغ وقدره . . .
سامى - كل رصيدى ألف جنيه لا غير .
نجيب - نعمه من الله ! فيه غيرك رصيده النهارده ما حصلش
٣ قروش صاغ . . .
سامى - لاحظ ان ألف جنيهه ما يعملوش حاجة يا نجيب .
نجيب - (فى تهكم) أبداً .
سامى - أنا باكلمك جد . انت أولا شفت فينى . بنت شيك
صحيح . اللي زى دى لازم تعيش عيشة « لو كس »
انت شفتها والا لا فينى ؟
نجيب - (مطرق) أبوه .
سامى - ايه رأيك فيها بدمتك ؟
نجيب - (مطرق) كويسه .
سامى - (فى تحمس) مش كويسه بس . . جنان .

- نجيب — (في صوت خافت) صحيح .
- سامى — بشر فك لو كنت انت في مركزى مش تعيدها ؟
- نجيب — (يرفع راسه) إيه لزوم السؤال ده ؟
- سامى — تعيدها والا لا ؟
- نجيب — ما أجابش .
- سامى — انت حر لكن أنا أقسم لك ان فينى مافيش زيها
اثنين في مصر . . .
- نجيب — (مطرق) ما حدش قال إنك كذاب .
- سامى — بنت «سبور» مدهشة يا نجيب . ساعات تسوق عربيتها
بنفسها : أولا عربية « باكار » ثخمة تصور أمبارح
بالليل في شارع الهرم كانت ماسكة الدركيون بيد
واحدة وايدها الثانية على كتفى . وماشين على
٨٠ كيلو .
- نجيب — (في سارة) وتدوس الغلابه المساكين !
- سامى — دى شاطرة . ما تخافش عليها .
- نجيب — (في نفس المرارة) طبعا . الخوف على اللي يمشى في
سكتها . . . (صمت) .

- سامى — (بعد لمظة صمت وتأمل) أنا أحبها قوى يا نجيب .
نجيب — وأنا كان ..
سامى — (ينظر اليه) وانت كان ؟ ..
نجيب — أيوه أنا كان أشجعك على ذلك .
سامى — (فى فرح) صحيح ؟
نجيب — وهى تحبك قوى ياسامى !
سامى — جدا .
نجيب — أنا .. أشجعها على ذلك .
سامى — انت بتتكلم جد ؟
نجيب — ما فيش داعى انى أهزر .
سامى — تفتكر انى كفء لها .
نجيب — بالتأكيد .
سامى — ما تنساش ان كل ثروتى عبارة عن الآلاف جنيهه
الموضوعة فى البنك .
نجيب — من ساعة هى ما حبتك ارتفعت قيمتك وبقيت
تساوى ثقلك ذهب .
سامى — ازاي الكلام ده ؟

نجيب - من يوم أنا ما عرفت انها بتحبك وأنت متمتع بكامل

احترامى الأول مرة أشعر نحوك باحترام عميق !

سامى - (فى دمشق) للدرجة دى ؟

نجيب - أمان ايه انت نايم ؟ فوق لنفسك كده وافهم انك

دلوقت حاجة تانية يا ستين مغفل .

سامى - لا ما تخافش أنا برضه فاهم لو تكون دى من قسمتى

حانقلب حاجة تانية صحيح والعب بالذهب لعب .

١٢٠٠٠ جنيه نقدية فى الزمن ده حاجة توهم غير

العقارات . علشان كده أنا بقول دى فرصة ..

خايف تطير من يدى .

نجيب - (ييمق) اخص ! صحيح إنك منخط ا انت مش

عارف أبدأ تخلىنى أحترمك خمس دقائق على بعض !

سامى - ليه؟ حصل منى ايه ؟

نجيب - انت مش فاهم وبس .. ومش ممكن واحد زيك

يفهم ...

سامى - ايه بس اللى حصل ؟

نجيب - حصل انك فاكرها بيعة وشروة وأوكازيون خايف

- يضيع منك . برضه انت حكيم سوقى تجارى .
- سامى - - بقى اسمع يا نجيب أنا مش جاى لك دلوقت علشان
تهزأنى .
- نجيب - - أمال جاى لى علشان ايه ؟
- سامى - - جاى لك علشان تساعدنى .
- نجيب - - أساعدك فى ايه ؟
- سامى - - تساعدنى بكل قوتك . وتنقذنى بأى وسيلة لأنى رايح
أقع من السما وانت ...
- نجيب - - انتظر شويه من فضلك قبل ما تقع من السما ...
وضح لى المسألة علشان أشوف إن كنت أقدر
أستلقاك والا ماقدرش .
- سامى - - طبعا المسألة واضحة . أهلها يستحيل يتنازلوا عن
أقل من ألف و ٢٠٠
- نجيب - - وبعدين ؟
- سامى - - وأنا مش عاوز أظهر بمظهر الضعف والفقر والاحتياج .
يعنى لازم أدفع فوراً اللي يقولوا عليه من غير تردد
أو بماطله .

- نجيب — كويس .
- امى — وانت عارف أن اللي معاى ألف بس . يعنى لازمنى
٢٠٠ قول ١٠٠ علشان أهون عليك . وأنا أبقى أتدبر
فى ال ١٠٠ الثانية .
- نجيب — أنا مش فاهم .
- سامى — بالاختصار أنا أرجوك تسلفنى ١٠٠ جنيهه
دلوقت حالا .
- نجيب — دلوقت حالا؟ !
- سامى — ايوه لأنى ناوى أقدم الشكوة والمهر وكل حاجة بكره
قبل ما حد يعطل الشغلة .
- نجيب — بقى أنت جاى لى علشان أسلفك ؟
- سامى — حالا ..
- نجيب — آه ..
- سامى — سكت ليه ... بتبص لى كدا ليه .. ؟
- نجيب — أنا قاعد أفكر مش لاقى ...
- سامى — الفلوس ؟ ..
- نجيب — مش لاقى رد كافي شافى ينرد به عليك .

- سامى — ليه ؟
- نجيب — عاوز تستلف منى ١٠٠ قرش ؟
- سامى — ١٠٠ جنيه
- نجيب — (يضحك ثم يضحك)
- سامى — أنا مستعد أكتب لك بالمبلغ كميالة ..
- نجيب — (يضحك ثم يضحك)
- سامى — بتضحك ليه بس ؟ .. هو دا وقت ضحكك يا نجيب ؟
- نجيب — أمال امتى وقت الضحك ؟ (ينهض ويصيح) أيتها
السموات اضحكى .. أيتها الغرفة اضحكى .. أيتها
الصندوق اضحك .. أيتها البواب عبد الله اطلع
حالا و اضحك (لسامى) واحد من أمرين إما إنك
تعبان شويه ويستحسن أنى أطلب لك أسعاف
بالتليفون ينقلك الى مستشفى الأمراض العقلية، وإما أنى
أنا اللى تعبان شويه لأنى أحتمك على ١٠٠ جنيه نقداً
وعداً بدون علمى وقاعد من حاش فى البيت مع أنى باسلف
الناس بكميالات .
- سامى — (يجذب نجيب من جاكته) أرجوك تقعد .

- نجيب — سينيبي أتسكلم وأقع نفسي أولا .
- سامي — اقعدي يا نجيب اعلمي مغروف .
- نجيب — (يجلس) قعدت .
- سامي — يظهر انك مش فاهم الموضوع .
- نجيب — ده مؤكد .. اني أنا فهمت غلط خالص .
- سامي — المسألة مسألة مستقبل . ولذلك أنا أتوسل اليك
يا نجيب . فاهم؟ أنا أتوسل اليك ..
- نجيب — العفو علشان إيه بس ؟
- سامي — تشوف لي ١٠٠ جنيه .
- نجيب — برده ... (صائحا) يارجل اعقل . اعقل والا أقسم
بالله العظيم أتكلم في التليفون ينقلوك في الحال ! . دا أنا
لسه يا بارد ما فيش خمس دقائق مصفر لك في البلكون
علشان تحدف لي نص ريال تقوم تجيني دلوقت تطلب مني
١٠٠ جنيه .
- سامي — انت يا نجيب شخصية معروفة في جميع الأوساط
والنوادي الكبيرة .
- نجيب — (يلتفت اليه بسرعة) يعني إيه ؟

- سامى — يعنى انك شخص ما حدش يرفضك طلب.
- نجيب — دا صحيح لىكن قبل كل شىء أنا شخص معروف عند الناس كلها ان لى كرامة.
- سامى — انت سالف من مارسيل البارمان ٢٠ جنيه .
- نجيب — مارسيل وأمثاله عارفين طيب ان الـ ٢٠ جنيه يقبضوها منى ٤٠ لما تيجى الفرص المناسبة . ومن هنا لغاية ما تيجى الفرص المناسبة ما أقدرش أظهر نفسى لجنس مخلوق .
- سامى — يعنى ما تقدرش تساعدنى يا نجيب باى طريقة ؟
- نجيب — فى الحالة الراهنة لا .
- سامى — ما تقدرش تستلف لى من تحت الأرض ؟
- نجيب — لو كان تحت الأرض فيه ناس بتساف ما كنتش انتظرت لما تفكرنى حضرتك .
- سامى — (ينظر فى الصالون) أنا كنت أعتقد انك تقدر . .
- نجيب — أرجوك ما تبصش كثير لطقم الصالون ده لأنه لسه مش مدفوع ثمنه ومنظور ينحجز عليه من يوم للتانى .
- سامى — يعنى ما فيش فائدة منك ؟

- نجيب — عينك كلها نظر .
- سامى — (فى يأس) ياخسارة يا فيفى .
- نجيب — (بعد لحظة اطراق) طبعا حاتزعل هى كان لو حصل مانع .
- سامى — بالطبع .
- نجيب — أيوه ... من غير شك .
- سامى — أيوه .
- نجيب — أيوه (لحظة) وانت ما تقدرش تصارحها بالمبلغ اللي ممكن تدفعه ؟
- سامى — مستحيل أنا لازم أفهمها انى عريس كفاء متيسر .
- نجيب — وليه تغشهم ؟
- سامى — الزواج كله كده دلوقت .
- نجيب — أيوه (لحظة صت وهو مطرق) المهم هو الحب .
- سامى — علشان كده زواجنا لازم يتم لاننا بنحب بعض .
- نجيب — (فى صوت منخفض غريب) ان شاء الله يتم .
- سامى — (فى أمل) ازاي ؟ . لقيت فكرة ؟ . الحقنى اعمل

معروف أنا أبوس رجلك انقذني .

نجيب - عندي فكرة واحدة (يفكر)

سامي - قول أنا في عرضك .

نجيب - (يفكر) ما فيش غير ...

سامي - (مهتم) غير ايه ؟

نجيب - خاتم الملك .

سامي - (نامضا) ونلقاه فين ده ؟

نجيب - موجود ... (يفتح درجا ويخرج خاتما من الماس) خد .

سامي - (يتناول الخاتم بتردد) لكن

نجيب - ايه ؟ ما ينفعش ؟

سامي - اديني عقلك ما ينفعش ازاي ؟ . دي حاجة نخمه قوى .

الله يرحمها الست صاحبة العصمة والدتك . انت يظهر

كنت ابن ناس طيبين في زمانك .

نجيب - هات بقي سيجارة وروح أرهنه أو شوف لك فيه

طريقة .

سامي - (في تردد وهو يتأمل الخاتم) لكن لا يانجيب

ماقدرش ! . أنا بأى حق أسمح لنفسي بالتصرف

فی تذکار عائلی زی ده ؟

- نجیب — مش مهم !
- سامی — أنا اعتقد ان ده تهجم منی عليك زیادة عن اللزوم
ولا أجرؤش انی أقبل کرمک الغریزی المدهش ده .
- نجیب — تجرأ واقبل وروح بسرعة رتب أمورک .
- سامی — علی کل حال یانجیب انا ما أقدرش أشکرک . لأن
عماک مش من الأعمال اللی تشکر علیها بکلمة أو
کلمتین . . وان قلت لك مرسی أو متشکر لعمل زی
دا-أبقى بارد . . أنت بالتأکید أنبل وأکرم وأظرف
وأشرف شخصیة خلقها ربنا . .
- نجیب — رح بقی ما تبقاش ابن کلب رزل . . دوشتنی . .
- سامی — طیب أناطالع بقی یانجیب أغسل وشی وأغیر لآنها جایه
دلوقت لأول مرة تتفرج علی الشقة . . اورفوار مؤقتا!
- نجیب — اورفوار .
- سامی — بکره أشوفک ضروری علشان أقول لك أنا عملت ایه
(خارجا)
- نجیب — (یصبح به) اسمع . .

- سامى — (يلتفت اليه) نعم .
- نجيب — معا كمش نص ريال سلف ؟ .
- سامى — . فى حركة حماسية يخرج محفظته (يا سلام يا نجيب ..
- د المبلغ اللي انت عاوزه جنيه .. خمسة .. عشرة .
- نجيب — باقول لك نص ريال .
- سامى — بس كده .. (يعطيه نص ريال)
- نجيب — أيوه بس نص ريال .. افهم عربى .. مش طالب
غيره ... هات كان سيجارة .. ولع لى ...
بس رح بقى ابعده عنى ... نهارك سعيد ..
- (سامى يخرج .. نجيب يظل وخذة على مقعد مفكرا يدخن)
(جرس الباب يرن)
- (نجيب ينهض بسرعة ... ثم يسرع الى الطاولة ويدخل الصندوق)
- (فيق تنقر على باب الصالون واذ تجده خاليا تتقدم في ترويض)
(وتجلس على مقعد ثم تتعلم وتنادى)
- فيق — ما فيش حد هنا ... سامى ...
- نجيب — (يرفع غطاء الصندوق أى المنضدة ويظهر رأسه)

- ١ - (تراه في الصندوق خارجا فتصرخ في رعب) آه ا . . .
- ٢ - (خارجا من الطاولة) لا مؤاخذة . . . باردون . . .
- ٣ - نجيب بك ...
- نجيب - أيوه . . أنا نجيب . . .
- فيفي - (ضاحكة ومشيرة الى الصندوق) وعامل في نفسك كده
ليه؟
- نجيب - مش مهم . . أولا أنا أحب أعرف سبب
تشريفك هنا.
- فيفي - وأنا أحب أعرف صفتك ايه هنا .
- نجيب - بقي حضرتك كل ما تقابليني في حنة تقولي لي
صفتك ايه .
- فيفي - طبعاً . اسألك عن صفتك هنا بالحالة دي .
- نجيب - صفتي اني في محل سكني .
- فيفي - (يدهشة) داخل سكنك . . امال سامي فين؟
- نجيب - شقة سامي فوق . حضرتك غلطى في الدور .
- فيفي - آه . . . صحيح . . . باردون . . . طيب أما أقوم أطلع
بقي . . . قبل كده مش تحب تقول لي انت كنت

مستخى ليه كدا ؟

نجيب - احتياطيا بس .. علشان ما أقابلش بعض الناس
غير المرغوب فيهم ...

فيفي - زى مين ...

نجيب - ناس كتير يطول شرحهم .

فيفي - أنا منهم ؟

نجيب - انت ؟

فيفي - قول بصراحة .

نجيب - ما أقدرش أقولك ... (فيفي تمتعض قليلا لهذا الجواب)

فيفي - مرسي .. وعرفت ازاي اني جيت ؟ .

نجيب - علشان ضربتي جرس الخطر ..

فيفي - جرس الخطر دا ايه ؟

نجيب - جرس الباب .. لأن كل واحد يضرب الجرس معناه

عندنا انه غريب عن البيت أقوم أنا في الحالة دي

أدخل الغواصة .. (يشير الى المنضدة) .

فيفي - (تنظر الى المنضدة التي على شكل الصندوق) الغواصة ! .

(تضحك)

نجيب — أمال!.. احنا دلوقت في حالة حرب.. ودخول الغواصة
ضروري علشان لو دخل حد من الاعداء يلاقى
الشقة ما فيهاش مخلوق يقوم يتقهقر با تنظيم ..
— (باسمه) والمعارف ... دول الحلفاء طبعا يدخلوا على

طول من غير جرس ...

نجيب — طبعا .. ولذلك الباب دايما مفتوح .. والحلفاء عندهم
تنبيه بعدم ضرب الجرس .

فيفي — أنا متأسفة اللي أزعجتك ودخلتك الغواصة من غير
سبب .. ما كنتش أعرف .. على كل حال اعتبر انك
كنت بتعمل مناورة .. انما اسمح لي أقول لك ان
دى طريقة غريبة ! تفكر ان فيه ناس كتير عاملين
صناديق وغواصات زى دى علشان ما يقابلوش
حد ؟ .

نجيب — ما أظنش .

فيفي — اسمعنى بقى انت اللي عجيب فى أطوارك ؟

نجيب — علشان ربنا خلقنى كدا ..

- فيفي — أنا ملاحظة ان أعصابك النهارده مرتاحة .
نجيب — الحمد لله .
- فيفي — انما دا ما يمنعش انك تكره الست اللي كانت بتاكل
جلاس عند جروبي زى ما تكره فاتورة الحساب
تمام .. مش كدا ؟
- نجيب — أرجوك ماتفكرينش بفواتير الحساب .
فيفي — ولا بالست اللي انت تكرها ؟
نجيب — لاحظى سيادتك أن سامى منتظر فوق .
فيفي — أنا طالعة حالا .. انت متضايق من وجودى ؟
- نجيب — أنا ماقلتش كدا .
فيفي — باين فى عينيك انك متضايق .
نجيب — وهو كذلك .
فيفي — علشان كده أسيبك .. أرفوار .
نجيب — أرفوار .
فيفي — (تتحرك الى الباب قترى الجرافون فى طريقها فتقف)
دا الجرافون بتاعك .. عندك اسطوانات جديدة .
طبعا .. على فكرة ، أما امبارح سمعنا فى ميناهاوس

دور جديد فى الجازماند بديع قوى ... اسمه ...

نسيت .. دلوقت أسأل لك سامى عن اسمه . انا

امبارح سقت الباك كار بنفسى ...

نجيب . — عارف ... فى شارع الهرم ... الدرکسيون بيد

واحدة سرعة ٨٠ كيلو .

فيفى — سامى قال لك .

نجيب — طبعا .

فيفى — بقى سامى لازم يقول لك كدا على كل شىء ؟

نجيب — صاحبي .

فيفى — على فكرة .. إيه رأيك فى سامى ؟

نجيب — رأيى فى سامى انه شاب مدهش ..

فيفى — أنا مش شايفاه مدهش فى حاجة أبداً .

نجيب — أستغفر الله .. اسمح لى أقول لك انك غلطانة قوى .

انت عاوزة أحسن من كده إيه بقى فى الدنيا ؟

شاب لطيف .. حكيم كويس .. عنده فلوس فى البنك

ما لوش داين يطالبه بقرش .. أو يزججه بفاتورة

حساب ... وفضلا عن كده .. بيحبك .

فيفى — بيحبنى ؟

- نجیب — یعبدک ..
- فیفی — مین کمان غیره بیجینی؟
- نجیب — مافیش غیره ..
- فیفی — انت کداب ..
- نجیب — مش عاوزه تصدقی .. انت حره ..
- فیفی — طیب بص فی وشى .. حط عینک فی عینی ..
- نجیب — لا لا لا اعملی معروف ما فیش داعی ابدأ انی أبص
فی وش حضرتک ولا أخط عینی فی عینک ..
- فیفی — شوف انت خفت من عینی ازای؟
- نجیب — ما علیہش .
- فیفی — قل لی یا نجیب ..
- نجیب — ما شاء الله .
- فیفی — إبه؟
- نجیب — نجیب کدا بس حاف .. ! لا نجیب افندی .. ولا
نجیب بک .. ولا حتی سی نجیب .. حضرتک واخده
راحتک معایه فی الکلام زیادة عن اللزوم ..
- فیفی — (فی امتعاض) کدا ؟

- نجیب — انت مش ملاحظه ؟ .
- فیفی — كنت أفكر انك «سبور» ..
- نجیب — اللي قال لك كدا غشك .
- فیفی — كنت أفكر ان لي الحق أعاملك من غير تكليف
بصفتك صاحب سامى الحميم .. ومع ذلك أنا خسر
إيه ؟ تحب أقول لك يا نجیب باشا ..
- نجیب — احب تقولى لي «جود باى» .. بس وتسيبيني في
حالى !
- فیفی — انت النهاردة وحش صحيح .
- نجیب — طول عمرى كده .. (يتناول سماعة التلفون بسرعة)
آلو .. مين .. سوسو .. اسمعى ، أنا لازم
أقابلك النهارده ... وهو كذلك ... بعد عشر
دقائق اكون عندك .. نروح فين .. زى ما يحبك
انت .. اورفوار مؤقتنا ... (يضع السماعة)
- فیفی — (فى سارة) دى واحده ست ..
- نجیب — .. اظن كدا ...
- فیفی — انا دلوقت فهمت .

— ٩١ —

نجيب — فهمت إيه ؟

فيفي — فهمت انك نسيت بالعجل الست بتاعة جروبي ..

نجيب — الحمد لله اللي فهمت كدا ..

فيفي — (تنصرف) نهارك سعيد ..

نجيب — (بلا حراك) نهارك سعيد ..

(فيق تخرج .. ويبقى نجيب لحظة جامدا ثم يرتدى على مقعد
ويضع رأسه بين يديه)

« ستار »

الفصل الثالث

عين منظر الفصل الثاني اى شقة نجيب
— نجيب واقف بقرب الجراموفون يسمع
اسطوانة La petite Tonkinoise
لجوزفين بيكر وهو يتحرك كأنه يرقص على
أنغامها . ولا تكاد الاسطوانة تصل الى
ربما حتى يدخل سامى .

-
- سامى — (فى اهتمام واندفاع) نجيب ا . . .
نجيب — (مشيرا الى الاسطوانة) هس ! اسمع النغمة دى ا .
سامى — المسألة مهمة قوى . فضك من التساع ده دلوقت .
نجيب — (يوقف الفونوغراف فى تيرم) هه ! مالك بقى يا سيدى
ادوشنى وقل مزاجى ! .
سامى — شوف يا نجيب المسألة انى أنا وقعت من السما . .
نجيب — وانا تلقفتك . انت ما عندكش شغل ابدأ غير
انك تقع من السما ؟ .
سامى — الحقيقة انهم مسألين مش مسألة ؟ .

نجيب - كان ؟

سامي - اولا الخاتم الالماس بتاعك ..

نجيب - ماله ؟

سامي - راح .

نجيب - راح إزاي يخرب بيتك ؟ .

سامي - راح من ايديك . من ايدينا ؟ . لاني خلاص قدمته

شبكة لفيفي ! . وانت اذا كنت تحب اكتبلك به
كميالة بأى مبلغ يعجبك يدفع على اربع سنين كان
بها.. وإلا اذا كنت تحب تشنقني اشنقني انا بين ايديك؟
واللى تعمله اعمله !

نجيب - تذكار امي يا جدع انت ! ...

سامي - انا غلطت ووريته لفيفي مسكت فيه . اضطريت

اقول لها انه الشبكة ! .. ونسيت ساعتها انه تذكار

امك .. (يستدرك) والدتك ! .. الحقيقة انه خاتم

مدهش يا نجيب .. كل من شافه يستعجب ! ما فيش

بضاعة زى دى دلوقت عند الجواهرجية ! ..

نجيب - وأهلها قالوا إيه ؟ ..

سامی — فرحوا طبعاً . وبقوا يوروه لمعارفهم . انا قلت لهم
ثمنه ٦٠٠ جنيه .

نجيب — ده اللي ينتظر منك .

سامی — ابدأ . الواقع انه يساوى كده برده . عند نجيب
الجواهر جى خاتم ما يجيش ربعه مكتوب عليه
٣٠٠ جنيه ! ..

نجيب — انت لو كنت رهنته على ١٠٠ أو ٢٠٠ جنيه ما كنتش
حاتقدر تقدم شبكة بالعظمة دى ! ..

سامی — ما هو ده نفس اللي أنا شفته برده ! ..

نجيب — احترموك طبعاً ؟ . ورقبتك بقت أطول من الباب ده .

سامی — طبعاً .

نجيب — وخطيتك مبسوطه بالتأ كيد ؟ ..

سامی — فينى حاتطير به طيران . لا بساه فى اصبعها ودائره
تفرجه للناس ! ..

نجيب — (فى صوت خافت) دا المهم ! ..

سامی — (بعد لحظة فى تردد) لكن بس ؟ ..

نجيب — (يرفع رأسه نحوه) إيه بقى ؟ .

- سامى — (ق تردد) انت مش زعلان يا نجيب ! .
- نجيب — علشان إيه ؟ .
- سامى — علشان الخاتم ضاع . لأنه لو كان إترهن على أى مبلغ ، كان برده على الأقل فيه أمل انه يرجع لك فى أى وقت ! .. لكن دلوقت ما فيش أمل ابدأ .
- نجيب — طيب وعاوز منى إيه بقى دلوقت ؟
- سامى — ولا حاجة . انت اللي عاوز منى !
- نجيب — عاوز منك إيه ! .
- سامى — من حقلك انك تزدربنى على الأقل وتحقرنى لاذى، زودتها خالص ! .
- نجيب — مش فاضى انا دلوقت احتقرك ..
- سامى — سكوتك يا نجيب بيخوفنى .
- نجيب — ما تخافش ..
- سامى — ضميرى بيوبخنى .
- نجيب — وآخرتها معاك بقى . انت عارف انا ما ليش تقل على الفلسفة . ضميرك يوبخك ، يهزأك ، يرقعك بالصرمة
- أنا دخلى إيه ؟ !

- سامى — طيب ..
- نجيب — آدى مسألة فانت .. إيه بقى المسألة الثانية ؟
- سامى — المسألة الثانية
- نجيب — انطق .
- سامى — كتب الكتاب .
- نجيب — ما له ؟
- سامى — كان غرضى يتم فى اقرب فرصة .
- نجيب — وجرى إيه ؟
- سامى — فى مصينه شويه وقاعدة تماطل وتمطوح .
- نجيب — وإيه السبب ؟
- سامى — مش قادر افهم .
- نجيب — من امى الكلام ده ؟
- سامى — انيرأ .
- نجيب — طيب وانت مستعجل على إيه ؟
- سامى — إزاي انت عبيط ؟ لازم تنتهى بسرعة قبل ما يخلصوا
منى القرشين (نجيب ينظر اليه شزرا) بتبص لى كده
ليه ؟ مش عاجبك كلامى ؟

أنا شايف انى باتكلم بعقل

نجيب — بعقل زيادة عن اللزوم .

سامى — أصل الموضوع ده بالذات عايز كده ا .

نجيب — بالعكس .

سامى — انت مش فاهم مركزى يانجيب . أنا أقل واحد تجرأ

أنه يخطب فيفى ! . دى تقدموا لها أكبر ناس فى

مصر ورفضتهم . انت نايم ؟ دى معروفة فى البلد كلها

انها لقطه وحيدة ، اللي ينولها كأنه نال ...

نجيب — (فى تهكم) البنك الأهلى ؟

سامى — السعادة فى الدارين ا

نجيب — دا صحيح ! .

سامى — ولذلك أنا عاير اطمئن ! .

نجيب — طبعا ! .

سامى — عايز اعمل كل جهدى ان كتب الكتاب ينتهى فى

ظرف أسبوع ! .

نجيب — أسبوع ؟ ا هو الزواج سلق بيض يا حضرة الافندى

والاھى العبارة نهب ! .. اهدأ واربد وتعفف شويه ا

انتم ليه كده ناس بطالين شباحين ! .. الدنيا بخير
ولله الحمد . ولا حدش ييموت من الجوع . وانت
عندك الف مدعوق مصرى فى البنك ! .

ابو - يعنى تفضل انى أترك لهم حرية تحديد اليوم اللي
يعجبهم ؟ .

يب - بالتأكيد ! ..

سامى - فكرة برضه . علشان ما اظهرش قدامهم بمظهر اللحوح
الملهوف ! .

نجيب - ما فيش عندك غير انك تظهر بالظهر ! برضه تفكيرك
مش عاجبني أبداً ! .

سامى - ليه ؟ .

نجيب - أنا والله خايف انك ما تستخفش عروسة جيسلة
زى دى ! .

سامى - (فى قلق) إزاي ؟ .. لأ ما تخوفنيش أمال ! . .

نجيب - ما عندكش عواطف أبداً : .

سامى - (يتنفس الصعداء) لأ عندي أطمئن : العواطف دى

موجودة دايماً فوق البيعة ! : .

نجيب - البيعة ؟ . شوف برضه أفاضلك مش عاجباني !

سامى — (يصيح) وبعدين بقى ؟ .. انت حاتطير لى برج من
عقلي . جاتك البلا سمج ! أنا مش ضرورى أعجبك
انت . أنا مادمت عاجب فينى ظظ فى حضرتك وفى
الدنيا كلها !

نجيب — (يطرق) أنا كل قصدى انك تعجبها !

سامى — عاجبها غصب عنك !

نجيب — دالمهم (صت . ينهض ويتجه الى الجرامفون ليدير الاسطوانة)

سامى — بلاش فونوغراف دلوقت اعمل معروف خلىنا
بتكلم شويه !

نجيب — عاوز منى إيه كان ؟

سامى — ولا حاجة !

نجيب — طيب خلاص بقى اعتق رقتى !

سامى — ماتخافش خلاص عتقتك . أنا كان غرضى اسألك عن

أحوالك انت !

نجيب — أحوالى أنا عال قوى كتر خيرك !

سامى — على فكرة : السبت اللي كنت قابلتها فى جروبي بتاكل

جلاس ووقعت فى حبها ! مافيش خبر عنها أبداً ؟

نجيب — لا ! ...

سامى - أنا متأسف انى غرقان لشوشتى فى مسألة فىنى زى
مانت شايف ، والا أنا كنت حالا شفت لك
طريقة !

نجيب - ممنون .

سامى - وأحوالك المالية ماشية ؟

نجيب - أحوالى المالية فتحت بصعوده بنط وقفلت بنزول
بنطين !

سامى - هى ايه ؟

نجيب - البورصة !

سامى - بورصة ايه ؟

نجيب - أعمل لك ايه ؟ .. حضر تك بتسألنى إذا كانت أحوالى
المالية ماشية ؟ أقول لك ايه بس ، شىء يجزن ؟ تاجر
أقطان أنا فى بورصة مينا البصل ؟ ! من أمتى كان لى
أحوال مالية ماشية والا قاعدة ؟

سامى - أنا غرضى اسألك عن الحجز المتوقع على عفشك
لسه ماشى والا ...

نجيب - طبعاً ده ماشى أمال حايروح فىن .

سامى - وامتى تحدد يوم البيع ؟
نجيب - ما اعرفش . اسأل عبد الله البواب هو اللي تعين
حارس !

سامى - على الله من هنا ليوم البيع يحى لك قرشين .
نجيب - منين ييجوا القرشين . . مادام ما انفتحت لناش
الجيوب ولا القلوب !

سامى - طبعا انت عارف ظروفى صعب !
نجيب - جداً .

سامى - على كل حال ربنا يفرجها من فضله . .
نجيب - والله أنا فى غاية الخجل من ربنا لأنه سبق فرجها كثير
من فضله !

سامى - (ينهش للافصراف) مش كثير عليه المره دى
كان . .

نجيب - انت قايم ؟

سامى - أبوه علشان ورايا ميعاد !

نجيب - مع خطيبك طبعا .

سامى - بالطبع مع فينى !

نجيب — طيب مع السلامة (ساهى يخرج بعد أن يحى بإشارة)

(نجيب ساهم بلا حراك لحظة)

عبد الله — (يدخل ومعه ورقة) سيدى نجيب بك !

نجيب — أفندم .

عبد الله — النهار ده كام فى الشهر ؟ .

نجيب — (فى ارتباع) ليه بقى الله لايسيتك ! .

عبد الله — لا مافيش حاجه ماتخافش ...

نجيب — ما انتش جايب وراك مصيبة النهارده ؟

عبد الله — لا مافيش لاسمح الله مصايب واحنا مالنا وما لها

شر بره وبعيد !

نجيب — أمال الورقة اللي فى ايدك دى ايه ؟

عبد الله — لأ دى لسه ماجاش وقتها !

نجيب — الحمد لله .

عبد الله — روق بال جنابك .

نجيب — أصل انت دايما تيجى تطلع على جتى البلا من غير

مناسبة ! ..

عبد الله — لا خلاص انشاء الله مايجيش على قدومى إلا الخير .

- نجیب — طیب یا سیدی عشمنا کده برده .
- عبد الله — الغرض وما فيه . أنا كنت عايز أقول لحضرتك ا
- نجیب — ايه ؟ اياك انت جاى طالب منى فلوس .
- عبد الله — برده ما أقدرش أكذب حضرتك فى دى ! .
- لكن بقى ا ..
- نجیب — لكن بقى ايه . أنا كان أملى تطلعنى مره كداب فى دى .
- عبد الله — على كل حال دى مسألة مش مهمة دلوقت .
- نجیب — أيوه كده أعمل معروف فضنا من المسائل اللى مش مهمة . . . انت كنت طالع ليه بالضبط ؟ ..
- عبد الله — هو النهارده مش ۱۲ فى الشهر ؟
- نجیب — النهارده ۱۴ .
- عبد الله — (صائحا) ۱۴ فى الشهر يا خير اسود ! .
- نجیب — (فى ملح) اسود ازاي ؟ .
- عبد الله — النهارده مصيبة مستنظر انا ولا اخاش دارين ! .
- نجیب — قلت لك كده تقول لى ما فيش مصايب النهارده ! .
- ايه بقى يا سیدی قول ! . تكلم ، موتنى ، هات

خبرى بالعجل ! ..

عبد الله — المحضر كان قال ان يوم اليبع ١٤ الشهر ده ! .

نجيب — ١٤ ابريل ! ..

عبد الله — جنابك مش عارف ؟ ..

نجيب — أعر ف منين ؟ ..

عبد الله — أنا سلمت لجنابك صورة من ورقة الحجز زى دى

(يقدم الورقة)

نجيب — وانت فاهم انى لاقى نفسى علشان أقرأ محاضر حجز

وافور دى قبل الميعاد ؟ ..

عبد الله — طيب خد جنابك استقرا الورقة دى وشوف يمكن

احنا غلطانين .

نجيب — هات ياسيدى ورينى (يتناول الورقة وينشرها ويقرأ

الآتى :-)

محضر حجز تنفيذى . انه فى يوم الأحد ٢ مارس

سنة ١٩٣٢ الساعة ١٠/٤٥ أفرنكى صباحا . بناء

على طلب الخواجات جبران سعد الله وأخوته

المتجدين لهم محلا مختارا مكتب حضرة حامد

فرغلى افندى المحامى . وبالاطلاع على صورة محضر
الحجز التحفظى الرقيم ٧ فبراير سنة ١٩٣٢ المحكوم
بتثيته . وعلى الحكم الصادر غيايا من محكمة مصر
الأهلية فى القضية المدنية نمرة ٤٨١٦ سنة ١٩٣٢
المشمول بصيغة التنفيذ والنفاذ ومعلن قانونا وموكل
لنا بتنفيذه . أنا عبد الحميد قزمان محضر محكمة
مصر الأهلية وصلت إلى شارع قصر النيل وبمساعدة
شيخ القسم قد تواجدت بالمسكن استتجار المدعى
عليه نجيب افندى احسان فلم أجده ، ونهت على
تابعه بواب العمارة عبد الله خميس المقيم معه فى
معيشة واحدة بدفع مبلغ ٥٦٨٠ قرشاً قيمة
المحكوم به والمصاريف واتعاب الحماماه . فأجاب
أن المدعى عليه غائب ولم يدم الدفع دخلت العين
المؤجرة وأوقعت الحجز التنفيذى على الآتى :-
عدد ١ تراييزة وسط خشب أبيض بأربعة أرجل
مستعملة سليمة . عدد ١ كنبول خزران وعليه
رخامة بيضاوى سليمة . عدد ١ بساط قطيفة مبرد

٤ في ٥ . عدد ٣ براقع ستاير خشب مشجر بحلية
قطيفة . عدد ١٢ كرسي خزران بيوية بني ؛ عدد ١
سرير خشب بلدكان بيويه بيضة وعليه مله خشب
بسلك وثلاث مراتب نوم بوجه تيل مقلم حشوقطن
ومخدين نوم بوش ستانيه أخضر ولحاف ستانيه
بمبه . عدد ٤ حال نحاس بغطاهم من فوق بعض
وزن الجميع ١٥ رطل . عدد ١ انجر نحاس أربعة
أرطال (.....)

(نجيب يقطع القراءة ويلتفت الى عبدالله في فرح)
والصالون ده نسوه ؟

بدا الله — نسوه ازاي ؟ محجوز عليه برده . استقرا جنابك
ضهر الورقة تلاقى بقية القائمة .

ب — (يقرأ) عدد ٦ كنبه وفوتيل وكراسي صالون .
عدد ٣ طاولة كبيرة وصغيرة . وعدد ١ فونوغراف
ماكة جرامفون وعشر اسطوانات أفرنجية وعربية
مستعلة سليمة

(نجيب يقطع القراءة ويلتفت الى عبدالله) حتى الجرامفون

والاسطوانات يا عبد الله ! دول قشطونا تمام .
وجردونا وخربوا بيتنا....

عبد الله — استقرا استقرا لسه كان

نجيب — (يقرأ) عدد ١ دولاب ملابس بضلفتين وبمراة
مصقولة سليمة . عدد ٣٤ قطعة فقط لا غير ولم نجد
خلاف ذلك ولعدم وجود »

(نجيب يلتفت لعبد الله) ازاي ماوجدوش خلاف ذلك؟
بقي ده كل العفش ؟ !

عبد الله — (يغمز بعينه) أصل أنا كلام في سر جنابك هربت
الباقى . . . التتائيش الخفيفة .

نجيب — كنت بالمرة هرب العفش كله يا عبيط .

عبد الله — ازاي أهربه ؟ ده يبقى اسمه عزال . وانا صنعتى هنا
بواب العمارة أقوم أعزل شقة بحالها من غير علم
صاحبها ؟ وأعزل حضرتك فين . ؟

نجيب — النهاية . أهو المحضر هو اللي عزلنا . . . (يعاود
القراءة) . . . فقط لا غير ولم نجد خلاف ذلك
ولعدم وجود من يقبل الحراسة فقد عينت عبد الله

خميس بواب العمارة حارسا على جميع ما حجز عليه
وحذرتة بالقانون وقبل الحراسة وحددت لمبيع
المحجوزات يوم الاثنين ١٤ ابريل سنة ١٩٣٢ من
الساعة ٩ صباحا لآخر النهار»

عبد الله - يعنى النهارده .

نجيب - (يستمر فى القراءة) « وحررت هذا المحضر وتركت
للمدين صورة مخاطبا مع تابعه عبد الله خميس لغيابه
وسلمت له صورة بصفته حارسا ،

عبد الله - وقال لى ان ضاع جنس شىء من اللى مكتوب
فى القائمة أروح أنا فى الحديد .

نجيب - طبعا .

عبد الله - امكن ادخنا بقينا العصر ولا فيش حد جه باع ولا
اشترى ! يكوونوش نسوا ؟

نجيب - ينسوا ازاي ؟ طول بالك دلوقت تتفرج على بهدلتنا
قدام اللى يسوا واللى ما يسواش !

عبد الله - وايه العمل دلوقت ؟

نجيب - ما فيش عمل بالمرة .

عبد الله - بس لو كانش راح من بألى ان النهارده ١٤ في الشهر ا

نجيب - يعنى كنت حا تعمل ايه يا سى عبد الله؟ دا حتى أحسن اللي راح من بالك . على الاقل علشان ما نزعلش قبل الهنا بسنه . فضك بلا وجع دماغ . دا أنا لو كنت ا كدر خاطرى علشان مسائل زى دى كان زمانى توفيت بقالى ١٥ سنة ومدفون النهارده فى قراة المجاورين (يتجه الى الجرامفون) اسكت لما استمع الاسطوانة المدهشة قبل ما ييجوا ياخدوا الفونوغراف !

عبد الله - لك حق جنابك ، فرقى ، ما حد واخذ منها حاجة !

(يخرج عبد الله . نجيب يدبر الاسطوانة اللي أدارها فى أول الفصل (لجوزفين بيكر) ثم يتحرك راقصا على أنغامها فى قوة وعدم اكترات)

(فى تداخل فجأة بعد لحظة فترى نجيب يرقص وحده فى الحجرة على نغم الاسطوانة فتقف باهجة مشاهدة . ويراهما نجيب فلا يفير ما هو فيه . . . ويظل يرقص غير حافل بوجودها وتسر فيسقى من حركاته فتجلس على مقعد أمامه تنفرج . ولا تتمالك أحيانا من الضحك لحركاته الفكاهية . الى أن تنتهى الاسطوانة ، فيرفع نجيب الابرة وهو يصفر بغمه .)

فیفی — (فی ابتهاج) مدھش ! أرجوك تعيد الاسطوانة
دی كان مرة .

نجیب — (ينظر اليها من رأسها الى حذائها ولا يجيب) ؟

فیفی — (فی امتعاض) بتبصلي كده ليه ؟

نجیب — شيء جميل خالص !

فیفی — ايه هو اللي جميل خالص ؟

نجیب — أولا دخول حضرتك على طول كده كأنها وكالة من
غير بواب !

فیفی — كنت عايزني أضرب جرس الخطر ؟ كان زمانك
دلوقت جوا الغواصة بقالك ه دقائق ، في الحر ده !

نجیب — سيادتك مش غلطانة المره دي في دور سامي ؟

فیفی — لا أبداً . أنا عارفة ان دي الأبارتمان بتاعتك .

نجیب — طيب بقي أنا أحب أعرف بسرعة سبب التشریف .

فیفی — اسمع أما أقول لك قبل كل شيء ، انت يجب تغير

بسرعة لهجتك دي وتكلمني بسرعة بشكل اللطف

من كده ، والا انا و حياة راس ماما أجنك وأوريك

النجوم الضهر !

- نجيب - وحياء راس ماما أنا شايف النجوم الضهر والصبح
والعصر وطول النهار . ومش منتظر سيادتك دلوقت
علشان توريهم لي !
- فيفي - ليه بقي ؟ .. ايه اللي مزعلك ؟
- نجيب - فيه ألف سبب وسبب !
- فيفي - ومع ذلك أنا دخلت فجأة لقيتك مبسوط بترقص .
على الجرامفون !
- نجيب - الطير يرقص مذبوحا ...
- فيفي - (في اهتمام) انت متألم ؟ من إيه ؟ أرجوك
تقول لي حالا ..
- نجيب - أقول لك انت ؟ !
- فيفي - ايه المانع ؟
- نجيب - مستحيل !
- فيفي - ما تتش واثق مني ؟
- نجيب - يا سيدتي العزيز . أرجوك ترك الموضوع ده نهائياً
ونتكلم في شيء مفيد . ان كان لا بد من الكلام .
- فيفي - انت بتحب .

نجیب - شوفى انت ازای حاترعلینى منك وتخلینى أبقى مش
لطيف ودمى يفور وأتیکلم کلام فارغ کثیر . وبعد
کده تحلفى ان أنا اللى محقوق .

فینى - طيب خلاص . مش حا أقول حاجة .

نجیب - انت کنت جایه علشان إيه ؟

فینى - کنت جایه علشان

نجیب - أفندم ؟

فینى - علشان أوريك الشبكة اللى قدمها لى سامى . خاتم

عجيب ! شوف . . . (تريه الخاتم وهو فى اصبعها) فص
واحد برلنت سوليتير .

نجیب - عجبك ؟

فینى - قوى . . قوى ، حاجة حلوة صحيح . وذوق جميل

صحيح . . .

نجیب - العفو يا فندم !

فینى - (تنظر اليه فى دهشة) ؟

نجیب - (يستدرک) قصدى يعنى بالنيابة عن سامى .

فینى - (صمت . تتامل الخاتم فى اصبعها) سامى غنى بالتأکید

نجیب - ايوه طبعاً .

- فیفی — هو كان قال لی .
نجیب — قال لك ايه !
فیفی — قال لی ان عنده ٦٠٠٠ جينه فی البنك رايح يبنى لی بهم
فيللا فی مصر الجديدة .
نجیب — (مازا رأسه فی تمك خن) ضربهم فی ٦ على طول !
فیفی — وقال لی أن عنده أطيان ما اعرفش فين .
نجیب — كان ؟ طبعا .
فیفی — ويحبني قوى تعرف ؟
نجیب — عارف ، و انت بتحبيه ، و كتب الكتاب امتي بقي ؟
فیفی — ما اعرفش . سامي عايز يكتبه من بكرة .
نجیب — له حق .
فیفی — لسكن أنا مترددة شوية .
نجیب — ما لكيش حق .
عبد الله — (يدخل) سيدى نجيب بك .
نجیب — خير . . .
عبد الله — (ناظرا الى وجود فيفي) دا . . . أقول . . .
نجیب — قول . . . خذ راحتك .

- عبد الله — المكوجى طالب حسابہ .
- نجيب — وانت ما عندكش لسان ترد عليه ؟
- عبد الله — ما أمکنیش أبدأ . غلب حماری وایاه .
- نجيب — وعایز ضروري تغلبنی أنا کمان وایاکم ؟ حسابہ
ککثیر ؟
- عبد الله — بقى له شهرين ما قبضش أبيض ولا أسود .
- نجيب — أعوذ بالله . ؟ وكان ساکت لیه لغایة دلوقت ؟
- عبد الله — إنسانیة منه .
- نجيب — وجرى لها ايه الانسانیة دى النهارده ؟
- عبد الله — لقی مافیش منها فایدة .
- نجيب — وایه اللى تشوفه انت دلوقت ؟
- عبد الله — یحی یحاسب جنابك .
- نجيب — (کالرتاح) یحاسبنی ؟ ؟
- عبد الله — مافیش غیر کده . . .
- نجيب — أنا عملت لك حاجة یا عبد الله ؟ . . زعلتک النهارده
فی شیء ؟ متأثر منی ؟ بینک و بینی ضغائن ؟ . . فهمنی
اعمل معروف . . .

عبد الله — أنا فاهم . جنابك تكره الحساب .. لكن ما باليد
حيلة ...

نجيب — يا سلام وسلم .. الحساب ده نهرب منه ازاي ؟
عبد الله — حساب المكوجي ؟ ..

نجيب — الحساب على وجه العموم .. الأرض فيها حساب ..
تنزل القبر نلقى فيه حساب .. نطلع السما نلاقى فيه
حساب .. ورانا في كل حته .. ما فيش فايده أبدأ .
فيفي — (تضحك ضحكة خفيفة) ؟

نجيب — روح يا شيخ قول للمكوجي دا يبرد شوويه .
عبد الله — ما يرضاش يبرد الا لو قبض .

نجيب — (صائحا) قل له يجي يقبض روحى بقى ، لأنى لا أملك
غيرها النهارده ! وتفضل من غير مطرود يا بواب
يامغفل قبل ما أعوج لك خلقتك باسطوانة من دول
وزى ما ترسى .. (نجيب يمسك اسطوانة .. عبد الله
يجرى خائفا) ؟

فيفي — (تضحكن ضحكها)

نجيب — شىء يقصر العمر (يهود الى قربها)

- فیفی — هدی نفسک شویه .
- نجیب — ما یمکنش . . . أهو أنا ما یمضیش علی نصف ساعة علی خیر أبدأ . . . لا بد من خبر مرعج .
- فیفی — ینظر ان مالیته مرتبکه شویه .
- نجیب — شویه ؟! انت متواضعة قوی !
- فیفی — طیب ما تجی تفکر فی تنظیم مالیته .
- نجیب — ما تتعبیش نفسک .
- فیفی — لیه ؟
- نجیب — لأن لو جمیع وزراء مالیه العالم اجتمعوا فی لوزان و عملوا مؤتمراً لتنظیم مالیته وتسویه دیونهم یؤتمرون نزع السلاح و دیون الحرب ، أوکد لك انهم یمکن ینجحوا فی نزع السلاح و دیون الحرب ولا ینجحوش فی مسألتی . عاوزه إیه بقی أكثر من کده !
- فیفی — للدرجة دی ؟
- نجیب — دی مسألة مش محتاجة لمناقشة .
- فیفی — لیه ماهیتک کام ؟ ولوان ده تطفل منی . . . لکن أنا مهتمة و أحب أجب یمکن أنجح أحسن من مؤتمرون لوزان .

نجيب — ماهيتى خمسين جنيه فى الشهر اسما . لكن الى
يوصل فى يدى ٤٤ جنيه و ٦٠٠ مليم بعد الاحتياطى
والمعاش ورسوم الدمغة وخلافه من تماحك آخر
الزمن !

فيفى — وبتصرف منهم كام فى الشهر ؟

نجيب — باصرف منهم حوالى ١٠٠ جنيه فى الشهر .

فيفى — (فى دمشق) ازاي ده ؟ ايرادك خمسين وتصرف ١٠٠

نجيب — باستمرار من نهار ربنا ما خلقتنى . علشان كده

المسألة عويصة ولا يمكنش حلها إلا إذا اخترعوا

حساب جديد يمشى بالمقلوب غير الحساب اللى

أوجده فيثاغورث .

فيفى — وتصرف المائة جنيه ازاي فى الشهر ؟

نجيب — ما أقدرش أقول لك . أنا لما يكون فى جيبي فلوس

ما احترمهاش . . . أصرفها بعقل ومن غير عقل .

يمكن ألاقى شحات فى السكة أعطيه ورقة بجنيه لانه

قال كلمة عجبتنى .

فيفى — انت مدهش !

نجيب — أنا انسان مكتوب عليه انه يعيش بشكل مخصوص
في الحياة ، ويستحيل تغيير حياته ، يستحيل ينتظم
ويستحيل يعيش يوم في أمان الله زى بقية
مخالق الله الطيبين !

فيني — حياة بوهيمية غريبة ! .

نجيب — ارتباك مزمن وعسر هضم اقتصادى وفقر دم
مالى ماهش علاج .

فيني — انت غلطان . افكر ان فيه علاج .

نجيب — ايه هو من فضلك ؟ .

فيني — لو تزوج واحد تفهمك ويكون عندها فلوس ..

نجيب — ويكون عندها « باكار » .

فيني — تمام كده .

نجيب — علشان ينباع الباكار ونغرق احنا الاثنين في نهار !

فيني — (باسه) وماله ! ..

نجيب — أظن واحد زى ما انخلقش علشان زواج .

فيني — تفتكر كده ؟ .

(جرس الباب يدق بشدة)

نجيب - جرس الخطر! .. (يتحرك ويسرع الى اللضدة ويرفع
غطاء الصندوق وبلتفت الى فيفي) عن إذنك دقيقة
واحدة؟!

فيفي - ما تدخل الغواصة؟ .. دى مش طريقة عملية أبداً.
نجيب - دا اختراع المائى! .. مستحيل أقدر أبص فى سخنة
مطالب ، أوقفوا مؤقتاً .

(يعلق على نفسه الصندوق)

عبدالله - (من الخارج) يا حضرة المحضر باقول لك نجيب بيه
مش موجود .

المحضر - (يدخل وخلفه خواجه وشيخ القسم وعبدالله) وجود
المدين وعدم وجوده ما مهمينش . (لشيخ القسم) نادى
الشيالين .

شيخ القسم - (يتجه الى الباب وينادى) اطلع يا شيال انت وهو!
المحضر - قبل ما نشرع فى التنفيذ انبه عليك يا عبد الله خميس
بصفتك تابع للمدين ومقيم معه فى معيشة واحدة
بأن تدفع لدينا حالا مبلغ ٥٦٨٠ قرشا واحنا
نوقف الاجراءات .. تدفع وإلا لا؟

عبد الله — لا . منين . هو احنا معانا خمسة مليم .
الخواجه — (وهو يتكلم بلغة واضحة سليمة مع عجمة خفيفة)
أنا عندى تفويض من الداين الخواجه جبران
لو تدفع أربعين جنيه يصير التنازل عن الحجز
والبيع .

عبد الله — (بنظر اليه ولا يعنى بالرد عليه ويلتفت للشياطين) شيل
شيل يا شيال .

المحضر — تابع المدين أجب بعدم السداد وشرعنا فى التنفيذ
تعال يا عبد الله خميس بصفتك حارس للمنقولات
قدم لنا المحجوز عليه .

عبد الله — آهى عندك .

المحضر — (معتدا) آهى عندى ازاي يا قليل الأدب يا حمار !
انت مش عارف أنا مين . فتح عينك كويس وكلبنى
باحترام . أنا حامي القانون وممثل سلطة الحكومة
انت فاهم ايه ! وشرف مركزى اعتبرك مبدد
وأحرد ضدك فى الحال محضر تبديد وتعدي وأحط
الحديد فى ايديك واضيع مستقبلك .

عبد الله -- لا ما فيش لزوم ، أنا غلطت والشفاعة لشيخ
التمن .

شيخ القسم - استسمح حضرة المحضر وابقى خد بالك يا ابني الا
تنضر (للمحضر) أصله مش واخذ على مقابلة
الحكام .

المحضر -- (في عظة) الحق علينا اللي عيناه حارس . ضيع
وقتنا واحنا لسه ورانا بيوع وحجوزات وانتقالات .

عبد الله -- يا جناب المحضر العفش تمام ما ضاعش منه قشاية .
المحضر -- (يعطى المحضر لشيخ القسم) خد يا شيخ القسم صورة
محضر الحجز واجرد وطابق ع القايمة (مجلس على مقعد)
الا احنا تعبانين من كثرة الأعمال . تعال استريح
يا خواجه يوسف .

الخواجه يوسف -- (ينظر الى فيق الجالسة المتفرجة في ابتسام)
بردون يا مدام .

فيفى -- (للخواجه) من فضلك ما يمكنش تأجيل البيع
لبكره واحنا ندفع كل الفلوس ؟

المحضر -- ما يمكنش يا هانم ، تأجيل البيع يتكلف مصاريف

ويستدعى إعادة اللصق والنشر وكافة الاجراءات ودى
بمطلات احنا عارفينها .

فيى — أنا متأسفة ما فيش فى شنطتى . ء جنيه دلوقت ...
انما أقدر ...

شيخ الحارة — (يقرأ ببطء فى الورقة) « عدد ١ تربيذة وسط
خشب أبيض بأربعة أرجل مستعملة سليمة ... »
فين ؟ ... (يلتفت حوله) مش موجودة .

عبد الله — دى فى المطبخ . مش موجودة ازاي . أجر دالأوده
دى اللى انت فيها الأول تلاقى كل شىء تمام .
المحضر — أيوه أجر دأوده أوده والشياطين تنزل أول بأول
والناقص يتحرر به محضر .

شيخ القسم — (يقرأ) « عدد ٦ فوتيل وكراسى وكنبه . عدد
٣ طاولة وفونوغراف .. الخ . (ينظر بعينه مطابقا)
الأوده دى تمام . انزل بها يا شيال انت وهوه .

عبد الله — (لشيخ القسم) حاتأخذ العفش على فين ؟ ..

الشيخ — على باب الشارع تحت ينرص حته حته علشان الناس
تجى على ضرب الجرس تدخل المزداد .

عبد الله — (يهز راسه آسفا) يا فضيحة جنابك ياسى نجيب بك !.
(ينهمك الشياولون فى زحزحة الكراسى وتغيير نظام الصالون
وينهض المحضر والخواجة يوسف ليدعوا الشيالين تنقل مقاعدهما
وتظل فىفى جالسة الى أن يدنو منها شياى يريد نقل مقعدها)
المحضر — تفضللى يا هانم الناحية دى . . فى الرواقه (تنهض فىفى
وتقف بجوار المنضدة التى فيها نجيب . ولكن لا يلبث أن يأتى
الشياولون لنقل المنضدة فتصبح فىفى ممانعة)
فىفى — (صائحة) انتظر يا شياى . انت واخذ الصندوق ده
على فىن ؟ . .

المحضر — دا من ضمن المحجوزات يا هانم .
فىفى — مستحيل ! ده فيه جوه حاجات غير محجوز عنىها طبعا !
المحضر — محجوز عليه يا هانم . من فضلك ماتعرقلىش التنفيذ
شيل يا شياى .
فىفى — (صائحة) مستحيل . . مش معقول . . لازم تسيدب
الصندوق ده .

المحضر — ما يمكنش يا هانم .
فىفى — أنا مستحيل أسمح بنقله .
المحضر — (فى غلظة) شيل شيل يا شياى . . بلاش عطله .
الخواجه يوسف — تقدرى يا مدام تدفعى كام من أصل المبلغ ؟

في في — أنا متأسفة ما فيش معايا النهار ده فلوس كفاية (جأة)
اسمع لما أقول لك : أنا أفدر أعطيك ده (تخلع الخاتم
من أصبعها) ايه رأيك ؟ ثمنه بالتأكيد أكثر من
مبلغك ! ...

الخواجه — (في دهشة يفحص الخاتم) خاتم الماس (يخرج من جيبه
عويته مما يستعملها الجواهرجية للفحص ويضعها على عينه
وينظر الى الخاتم) طبعا دا يساوى كثير .

نجيب — (فجأة يرفع النظاء ويظهر صاحبها بين دهشة وارتباك الجميع)
انت مجنونة ! ؟ هات الخاتم ده ياخواجه !

المحضر — (بعد لحظة وجوم) باسم الله الرحمن الرحيم . طلع منين
ده ؟

شيخ القسم — دا لازم المدين (المحضر والشيخ يستعملان من عبد الله
الذي يشرح لها همسا)

نجيب — الخاتم .. هات الخاتم ياخواجه اعمل معروف .

الخواجه — بردون يايبه ؟ (ينظر الى فيفي التي سامت اليه الخاتم) .

نجيب — ما فيش بردون .

في في — اسكت يا نجيب مال كاش دعوى ! نخلي الخاتم معاك
ياخواجه .

نجيب - ازاي الكلام ده ؟ دا خاتم الماس مش لعب .
فيفي - عارفه انه خاتم الماس مش لعب .. وعاوزه اتصرف
فيه .. أرميه البحر .. الخاتم بتاعى أنا . انت
شريكى !

نجيب - بتاعك ازاي ؟ !
فيفي - باقول لك اسكت يا نجيب انت مالكش دعوى !
نجيب - ماليش دعوى ازاي ؟ أمال مين اللي له دعوى ؟ دا
شئ بجنن ا . هات الخاتم ياخواجه يوسف .

فيفي - ما تسمعش كلامه ياخواجه .. زى أنا ما قلت لك
خلى الخاتم معك وبكره أجيب لك مبلغك على شرط
توقف البيع حالا .

الخواجه - بكل ممنونية ياهانم .. يا حضرة المحضر أنا طالب
ايقاف البيع .

المحضر - انزل يا شيال انت وهو (يتناول ورقة ويكتب)
محضر ايقاف (تم يكتب فى صمت ويقول) أوقفنا
الاجراءات كطلب وكيل الداين ، تعالى امضى
ياخواجه يوسف .

الخواجه — (يوقع على ورقة المحضر ثم يخرج ورقة من جيبه ويكتب ايصالا

يقدمه لفيثي) مرسى ياهانم . آدى وصل بخاتم الماس

فص واحد برانت سوليتير وزن ٨ قراريظ :

نجيب — (بسرعة) تسعة ونصف . .

(فيثي تنظر اليه والجميع في استغراب فيستدرك بسرعة)

أبوه . . أنا عارف من سامي .

يوسف — (وهو يكتب) تسعة قراريظ ونصف . . (يسلمها الورقة)

اورقوار ، اورقوار يا نجيب بك .

(يخرج)

نجيب — (يضرب اخماسا لاسداس) أما يا ناس دي عجبية !

المحضر — نهاركم سعيد يا حضرات . . (يخرج خلف الخواجه

يوسف ومعه شيخ القسيم)

عبد الله — (خارجا هكذا خلف المحضر) اخلي طرفي يا جناب

المحضر . . الحكومة حرسنتني على العفش وطلع لله

الحمد سليم (يخرج مع الجيم)

فيثي — (وحدها مع نجيب) عجبية ليه بقى ؟ . . حاجة

طبيعية خالص . . كنت متظنر اني أسليهم

- ياخدوك فى الصندوق بيعوا فيك ويشتروا كاش
مخجوز عليك انت كان ضمن المويليا؟
نجيب — وماله ١٩ لكن الخاتم ؟ .
فيني — فى داهية الخاتم ايه يعنى الخاتم أدفعه فديه
بصفتى من الحلفاء أحسن ما كانوا يصادروا الغواصة
باللى فيها ؟!
نجيب — غواصة ايه ؟! أحنا خسرنا الحرب !!
فيني — (ضاحكة) أبدأ بالعكس ..
نجيب — ايه اللى كسبناه ؟؟ ..
فيني — كل حاجة .. أنا مندهشة ليه تهتم بالخاتم بالشكل
دا ؟!
نجيب — بس علشان ده . . . شبكة سامى ..
فيني — وايه يعنى ؟؟ ..
نجيب — طيب ورايحه تقولى لسامى ايه لو سألك النهارده على
الخاتم ؟؟ ..
فيني — أقول له على اللى حصل .
نجيب — ما يصدقش ..

— جاز ما يصدقش . لأن سامى مش زيك اوزي،
دى عقليته ما تقدرش تفهم بسهولة التصرفات
دى ..

— لأنه رجل عاقل موزون .

فيني — زيادة عن اللزوم .. ولذلك أنا رايحة أكله كلام
شديد ..

نجيب — حا تقولى له ايه؟؟ ..

فيني — حا أقول له أنا مندهشة إزاي واحد صاحبك
سا كن معاك فى بيت واحد ينحجز عليه وانت
سا كت؟! ..

نجيب — حا يعمل لى ايه ... كل واحد عنده ظروفه .

فيني — اسمع يا نجيب، انت إما مغفل .. ما تأخذنيش
وإما عاوز تدافع قدامى عن سامى دفاع ما يستحقوش .
انت بالتأكيد تفهم سامى أكثر منى . لأنى فهمت
طبيعته كويس قوى من مدة بسيطة .

نجيب — أنا أشهد لك دايمًا بالذكاء ... ايه بقى اللى
فهمته؟؟ ..

فینی — فہمت اذہ رجل عاقل زی ما قلت انت تمام، ویوزن
کل حاجة فی الدنیا زی طبیعة کل شخص مادی
شویہ .

نجیب — ایہ کان ؟! ..

فینی — أنا أفهم کویس الناس المدهونین بویہ . . سامی
مدهون بویة کویس قوی .

نجیب — کل الناس کدا .

فینی — انت لا .

نجیب — لیه بقی ؟؟ . أنا یعنی اللی خشب أبيض زی طرا بیزة
الوسط! المسألة ان ظروفی غیر ظروف سامی . . .
وأنالو کنت لقیت فیہ فایدة کان زمانی ضربت
نفسی بویہ بالزیت . . . ثلاث . . . أربع أوشاش .

فینی — ما افتکرش .

نجیب — علی کل حال . . . بعد الزواج فی إمكانک تخلقی
سامی خلقة جدیدة .

فینی — أنا مش عاوزہ أخلقه ولا أسخطه .

نجیب — عاجبک زی ما هو کده ما فیش بأس .

فيفي — أرجوك . بس . كفايه . . . احنا تكلمنا عن سامى
زيادة عن اللزوم . . . كلمنى عن موضوع تانى . . . كلمنى
عن نفسك .

نجيب — أ كليك عن نفسى أقول ايه ؟ (بشير الى الصالون المبعثر)
آدى انت على يدك شايفه كل حاجة .

فيفي — حقا ، صحيح انت الشخص الوحيد اللى أقدر أقول
أنه ما حاولش لحظة انه يغشنى . . .

نجيب — انت لطيفة قوى معايه النهارده من غير مناسبة ا بس
ضيعت الخاتم ، لكن بقى الامر لله . ا . الكلام
دلوقت أصبح ما يجيش منه .

فيفي — ما لكش دعوى بالخاتم . اسمع يا نجيب ا انت
نسيت الطب الروحانى والسحر العجيب ؟ . . .

نجيب — مش فاهم غرضك .

فيفي — انت مش تعرف تقرا لى اللى فى ضميرى ؟

نجيب — أبداً .

فيفي — ازاي ؟ مش فاكر لما تقابانا أول مرة فى العيادة ؟

نجيب — آه ا لأ أرجوك تنسى المقابلة دى والللى حصل فيها .

- فيفى - انت عييط ! انساها ازاي ؟ انت ما تقدرش تطلب
منى طلب زى ده .
- نجيب - انت حره.. لكن انا أنسى زى ما يعجبني .
- فيفى - لآما تنساش يانجيب ، أرجوك !
- نجيب - عجائب ! انت كان عاوزه تحجزى على ذا كرتى !
- فيفى - أيوه عاوزه أحجز ...
- نجيب - (بملاحظة) وايه بقى اللى يهملك من كدا ؟
- فيفى - ما تعرفش إيه اللى يهمنى ؟ ..
- نجيب - أبدأ .
- فيفى - ما تقدرش تقرأ لى اللى فى قلبى وضميرى داوقت ؟
- نجيب - فى ضميرك انك قاعدة تمكرى على وتلعبى بمهارة
مخيفة .
- فيفى - (باسمه) كداب !
- نجيب - (مستمرا) فى ضميرك انك عاوزه ترجعنى فى نفسى
أمل بسيط من غير لزوم عاشان فى الآخر أقع
من سابع سما السابع أرض زى الدورق الفخار اللى يقع
من فوق السطح على الأسفلت .

- فیفی — کذاب .
- نجیب — فی ضمیرك انك بتجی شخص کویس قوی وهو
بیحبك کثیر قوی .
- فیفی — والشخص ده موجود هنا فی الأودة دی دلوقت ؟
- نجیب — بالطبع لا .
- فیفی — کذاب .
- نجیب — (فی دمهنة) کذاب ؟
- فیفی — (فی اخلاص) من غیر شك کذاب لو تفتکر ان
الشخص ده مش موجود هنا دلوقت قدامی . . .
- نجیب — ؟ (ينظر اليها فی صمت وکانه یغالب نفسه ثم یطرق مفکرا)
- فیفی — ؟ (تطرق فی انتظار جوابه بصبر نافذ ثم ترفم رأسها کی
تقول شیئا لاخر اجه من صمته)
- نجیب — (یرفع رأسه أخیر الیها) متشکر علی التصریح الخطیر
ده ! .
- فیفی — (فی امتعاض) بس کده ؟
- نجیب — (فی عزم) بس کده .
- فیفی — دا کل الی تقدر تقوله ؟ .

- نجيب -- كفايه .
فيفى -- (فى يأس) أنا كنت منتظرة انك حاتقول كلام
كثير ! ..
نجيب -- متأسف قوى . . أنا صحيح فى شدة التأثير من
تصريحك ، لكن بقى ...
فيفى -- لكن بقى إيه ؟ ..
نجيب -- لكن بقى .. ايه قيمته دلوقت ؟ تفتكرى حايفير
ايه من الموقف كله .
فيفى -- فهمت قصدك . انت جنتلمان زيادة عن اللزوم .
نجيب -- أرجوك تطلعى فوق لخطيبك وتسحى تصريحك .
فيفى -- مش عاوز بأى حال من الأحوال تقبله منى ؟ .
نجيب -- فات الأوان ! .
فيفى -- (بملحظة) ضميرك مش قادر يسمح لك انك تاخذ
من صديقك خطيبته .. مهما كانت الظروف . مش دى
كل المشكالة اللي قايمه فى نفسك ؟ !
نجيب -- (مطرق كالخطاب لنفسه) أيونه، مهما كانت الظروف .
فيفى -- (ل تاثير) نجيب ...

— (في عزيم) الوداع يا فيفي !

(يتناول يديها ويضغط عليهما في حرارة واخلاص . ثم
يشيعها الى باب الشقة ، ثم يعود وحيدا وهو مطرق يمضي
في بطاء . ويقف في وسط القاعة بلا حراك لحظة ثم يرفم
رأسه فجأة ويقول :) وأنا وش زواج ؟ أنا رد

حجوزات !

(ثم يتجه إلى موضع الجراموفون ويدير الاسطوانة ويصفي
اليها قلبا شاردا الفكر ساها ثم يتحرك فجأة واقمصا على
أنغامها كأنما يريد أن يقنع نفسه بان حياته هي دائما حياته .
وانه لم يتغير في حياته شيء ...)

« ستار »

رصاصتہ فی القلب

فی السینما

- کتبت رصاصتہ فی القلب عام ۱۹۳۱ .
- وأخرجت فی فیلم سینمائی عام ۱۹۴۴ .
- بطولہ وألحان وغناء الموسیقار محمد عبد الوهاب .
- وإخراج الأستاذ محمد کریم .





توفيق الحكيم

كلمة المؤلف

« لا شأن لي بالسينما » كان هذا ردى دائماً على كل من حاول إغرائى بإخراج رواية لي على الستار . ولعلى قلت ذلك أيضاً لصديقى الأستاذ محمد عبد الوهاب . ولكنه جعل يهون على الأمر ، حتى وقعت أخيراً بين حبائل أو « شرائط » هذا الفن العجيب ...

ولست أدرى بعد نتيجة هذه « الوقعة » . فأنا قد سبق لى أن أبديت رأى فى الفن السينمائى ، وقلت إن الكاتب غير محتاج إلى الالتجاء إليه . لأن القلم كامل بنفسه ، لا ينبغى له أن يستند إلى أداة أخرى تعينه على التعبير . وإن عالم الكتابة مستقل بصوره ومخلوقاته ووسائل إخراجها ، إذ الكاتب فى الحقيقة ليس هو الذى يصف جملاً وينسق عبارات ، إنما هو ذلك الذى يصنع طاماً زائراً بالأشخاص التى تحيا

وتشعر وتسى دون أن يحتاج في إنشاء هذا العالم إلى غير
قلبه وحده ...

هذا الرأى لم يزل قائماً عندى ما تغير . ولكن الذى تغير
هو شعور الكتّاب السجين مع مخلوقاته فى صفحاته ، المكبل
معها طويلاً فى أغلال سطورهِ ... مثل هذا الكتّاب يجد من
الأنانية أحياناً أن يحرم أشخاصه حق الانطلاق لحظة خارج
جدران كتبه ، لتحيا بعيدة عن الإطار الذى اعتادته واعتاده .
الناس ، نابضة من جديد ... فى إطار آخر من صنع أيدٍ جديدة .
هذا الخوف من الأثرة هو الذى حملى على أن أتيسح
لأشخاص « رصاصة فى القلب » بجالا آخر تتحرك فيه غير
مجال الورق ...

وبعد فإنى أرجو أن أكون على صواب . ولعل
ما يدعونى إلى الرجاء هو حسن اختيار من وضعت فى أيديهم
مصير « أشخاصى » ، وما من أحد يشك فى أنها أيدٍ معروفة
فى عملها بالصبر والسكدة والاجتهاد . وانه لمن الظلم أن أسهب
عن ذكر تلك الجهود للضنية التى بذلها الأستاذ عبد الوهاب

والمخرج الأستاذ كريم ومن عاونوهما خلال عامين طويلين
لإعداد هذا العمل الذي يشاهده الناس اليوم في ساعتين .
فإذا ظفروا به ذلك بنجاح فهو حقهم وجزاؤهم وتمرة
مجهودهم وخدمهم .

توفيق الحكيم

١٩٤٤



مکتبہ

كلمة المخرج

إذا أتم الإنسان عملاً من أعماله وفق مرامه وهواه فإنه يشعر بإحساسين ... إحساس الغبطة بتمام عمله . وإحساس الأمل في نجاح ما قام به واستفادة الجمهور منه .

ولسكنى وقد أتممت فيلم (رصاصة في القلب) وهو أول إنتاج للسينما من كاتبنا الكبير توفيق الحكيم أحسن غبطتين ، وأستشعر أمليين .

فغبطتى بتمام عملي تصاحبها سعادة أخرى أتاحتها لى من مشاركونى فى مهمتى ممن لم أكن حظيت قبيل اليوم بمشاركتهم ، فقد كان هذا الفيلم فرصة طيبة لى عرفتنى بأخوان أذكياؤ كفاء سررت بهم ولمست فيهم من الكفاية والمقدرة ما ملأنى نفراً بزمالكهم وسعادة بتوفيق الله فى معرفتهم .

وأما أملى في النجاح فقد تضاعف بمقدار ثقتى بقوة
الزملاء وبمقدار ما عرفت فيهم من الإخلاص للعمل
والفناء فيه .

ولئن تحقق هذا الأمل فلا أشك في أن لهم في تحقيقه
النصيب الأوفر واليد العليا وما كنت معهم إلا واحداً
منهم يدفعنى إخلاصهم إلى الإخلاص وتحفزنى كفائتهم
إلى الاجتهاد .

فأهم منى خالص الشكر والتقدير ، وأتمنى لهم شكر
الجمهور وتقديره .

محمد كريم

أسرة فيلم رصاصة في القلب (١٩٤٤)

- التأليف والحوار : توفيق الحكيم
- السيناريو والإخراج : محمد كريم
- الغناء وللموسيقى والبطولة : محمد عبد الوهاب
- رئيس الفرقة الموسيقية : عزيز صادق
- كلمات الأفانى :

(١) إيليا أبو ماضى

(٢) أحمد رابى

(٣) حسين السيد

(٤) مأمون الشناوى

— التصوير : محمد عبد العظيم

أخذت المناظر وتم طبعها وتحميضها باستوديو مصر
عبد الله ياقوت - عبد الحميد أمين عبد المنعم - أنور على

— الصوت :

للأغاني : مصطفى والى .

للحوار : قدرى محمود .

إميل عطايا وحلمى رهمى : مساعدان -

كامل حافظ : آلات العرض

— الديكور : ولى الدين ساح

— الماكياج : حلمى رفته

— الريجسير : قائم وجدى

— المونتاج : إحسان فرغل

الممثلون

- محمد عبد الوهاب * في دور «محمّن» [«نجيب» في النص الأصلي]
- راقية ابراهيم * في دور « فيفي »
- سراج منير * في دور « دكتور سامي »
- هلى السكسار * في دور « عبد الله الجواب »
- عبد الوارث عسر * في دور « أبو العزائم » الشحاذ .
- فاتن حمامة * في دور « نجوى »
- بشاره واكيم * في دور « عبده بك »
- الهام حسين * في دور « طماطم »
- عبد القدوس * في دور « خورشيد باشا »
- زينب صدقي * في دور أم « فيفي »
- ليلى فوزى * في دور « حسنية »
- سيد سليمان * في دور « مارسيل »
- حسن كامل * في دور « المحضر »
- فيليب كمال * في دور « الخواجه »



محمد عبدالوهاب

أغاني الموسيقى
محمد عبد الوهاب

كلمات « إيليا أبو ماضي »

لست أدري

جئت ، لا أعلم من أين ولكني أتيت
ولقد أبصرت أممي طريقاً فشيت
وسأبقي سائراً إن شئت هذا أم أبيت
كيف جئت ؟ كيف أبصرت طريقتي ؟ ...

لست أدري

أنا لا أذكر شيئاً من حياتي للماضية
أنا لا أعلم شيئاً من حياتي الآتية
لي ذات غير أني لست أدري ماهيه
ففي تعرف ذاتي كنه ذاتي ؟

لست أدري

أین ضحکی وبکائی وأنا طفل صغیر
أین جهلی ومراحمی وأنا غص غریب
أین أحلامی وکانت کیفما سرت تسیر
بکلهما ضاعت ولکن کیف ضاعت

لست أدری

كلمات «أحمد رامى»

مشغول بغيرى

مشغول بغيرى وحببته يا ريتنى ما كنت رأيتته
صورت جنة من الأحلام وهبتها غصن وودى
وسبت قلبى الشارد هام فى جنة الحب ينادى
يطلب أليفه يسعد بطيفه
ويقضى عمره راضى به - واه
وفضلت أمتى أعشق واتهى
أتأبى طيرى لايف بغيرى

وانت يا قلبى

حبك وحبى

لى لقيته بيبب بغيرى
مسكين يا قلبى حيران فى حبى .

لا انت حانقدر يوم تسلاه
ولاح ترضى تبوح بهواه
وتداوى جرحك بالنسيان
بعد اللى نايك م الحرمان
مسكين يا قلبى
مظلوم فى حبي
للى باحبه ويحب غيرى

الميه

الميه تروى العطشان وتطفى نار الحراف
يا جماها والحوض مليان وانا حاييم على وش للميه
وان طال بك ليل الأوهام وعيونك مش قادره تنام
صمدقنى خذ لك حمام يجى نومك والليله هنيه
يا محير قلبك وعنيك ليه تشكى والحق عليك
الدنيا بتضحك حواليك أتمتع واضحك للميه

حنانك يا ربى

نناك بى يا ربى أنا بايدى كويت قلبى
ليه اجنى على روحى وأحرمها نعيم حبى
ضيت صبرى وانا وحدى منيش لاقى حبيب جنى
لما الحظ وافانى وشفقت اللى هواه يسى
ننيت روحى بكتبانى وكان الذنب مش ذنبى
يكان لى قلب مايش بيه صبحت أبكى على قلبى

فحيت قلبى وضنيت حالى وازداد حبى ضحيت مالى
ورضيت بحكم الزمن وشربت نار الأسى
قلبى ملاء الشجن والدنيا قضيت على

کلمات « حسین السید »

حوار غنائی

محسن : حکیم عیون افہم فی العین

وافہم کان فی رموش العین

أعرف ہواہم ساکنین

واعرف دواہم بیجی منین

قامت کثیر منہم وقربت کثیر عنہم

فیہی : اسمع یا دکتور . أنا اعرف ان الألم یجی من

عصب الضرس لما الواحد یا کل حاجہ ساقہ

محسن : عاشان تحریمی تا کلی جلاس

وتدوبی فی قلوب الناس

فیہی : وعرفت منین ؟

محسن : ما تعرفيش إني أقدر أقرا أفكارك
ومن عينيك أقدر أقول لك كل أسرارك .

فيبي : حكيم روحاني حضرتك . . ؟
طيب اقرالى اللى فى قلبى واحكى لى عليه
محسن : اللى مکتوب فيه بيخوف ما اقدرش احكيه .

فيبي : بيخوف مين ؟

محسن : بيخوفنى

فيبي : انت كل حاجة تحشر نفسك فيها حتى قلبى
محسن : يا ريتنى صحيح أقدر أكشف

قلبك واسأله عالى فى بالى .

فيبي : تسأله عن إيه ؟

محسن : حاز اعرف

إن كان مشغول والا خالى .

فيبي : شىء ما بهمكش . . .

محسن : ما يهتميش ازاي . . . !!

فيبي : طب ما تميطشى

محسن : عندي سؤال لو تسمعني . أقدر أقول هولاك ؟

فيبي : قول

محسن : فيه يا ترى شخص بهمك

شاغلك ومسنول به قلبك ؟

فيبي :

محسن : والشخص ده موجود هنا ... ؟

فيبي :

محسن : يعني انت عارفاه مش كسدا ... ؟

فيبي :

محسن : والشخص ده شايفاه دلوقت قدامك ؟

فيبي : بالطبع لا

زعلت مني والا ايه ؟

محسن : أبدأ وحازهل منك ليه

دلوقت بس صدقتك خدعوني قلبي وعينييه

واللى انك كتب جوا قلبك أتاريه لغيري مش لي

أحبه مهما أشوف منه

أحبه مهما أشوف منه ومهما الناس قالت عنه
أحبه ...

شغلني والامل خاني وحير كل أفكاري
سقاني الكاس وراح فاتي لا انا سكران ولا داري
بيظلم في وبجبه
وقاسي على وبجبه

واحبه مهما أشوف منه ومهما الناس تقول عنه
أحبه ...

شهور وايام بيظلمني وقلبي راضي بقايله
لا قادر هو يفهمني ولا قادر انا احكي له
جنيت على قلبي وبجبه
وضعت حبي وبجبه

واحببه مهما أشوف منه ومهما الناس قالت عنه
أحببه ...

قابلي صدفة وقابلته وروحي سلمت قبلي
ياربتي كنت ما شففته ما ناهني غير ضياع أملي
واحببه مهما اشوف منه ومهما الناس قالت عنه
أحببه ...

حوار غنائی

محسن : حاقولك إيه عن أحوالى بعد اللى شفتميه بعينك
آدى حيانى وآدى حالى حاخبي إيه تانى عليك

فیبی : وإزای تمیش بالشکل ده ؟

محسن : ما اقدرش أعیش إلا كيدا

فیبی : فاكر لما شفنا بعض أول مرة ...

محسن : أبوه فاكر ... لا مش فاكر شىء بالمره

فیبی : كان حلم جميل

محسن : واديني لسه عايش فيه

فیبی : كان حلم جميل

محسن : نسيتك وانت كان انسيه

فیبی : إنساه لوحدك أما أنا

عمرى ما أنسى اللى مضى .

عندى سؤال

محسن : اتفضلې

فيڻي : تسمح تجاوزې؟

محسن : قوی

فيڻي : تقدر تقرالى اللى فى قلبى وتقوللى عليه؟

محسن : مكتوب فيه واحد بيحبك وانت تحببته

فيڻي : والشخص ده موجود هنا؟

محسن : بالطبع لا

فيڻي : إنت كذاب

دائماً تترفضنى كذابا

محسن : ممكن يكون واقف طالب

فيڻي : دا شايفنى وانا شايفاه وفاهمنى وانا فاهاه

من غير ما تقوللى هذرك أنا شفتته

قلبك مختار بين صاحباك وخطيبته

لسكن يا محسن أنا خايفه تكون بسببى متألم

محسن : بالعكس ... أنا أشكرك على الألم ده ... انت فاكره

الجلاس اللى كلتها . مش كانت بارده ؟
حياتي كانت كده ، وفاكره لما دابت من حرارة
شفايفك ، حياتي من ساعتها بقت كده .
أنا مندهش إزاي كنت عايش فى الدنيا من غير
ما أعرف حرارة الألم .

ولقيتني عايش بين قلبين
اتماهدوا من قبلى الاتنين
ما رضيتش افرق بين أملين
وأكون سبب فى عذاب حبيبين
ضحيت بغرامى ونصيبى
واخترت آلامى وتعذيبى
وآلامى هى اللى حاتففضل
من حبي بعد الحرمان
واللى ما سهرش ولا اتألم
عمره ما يتسمى إنسان

محسن : الوداع يا فينى
فينى : الوداع يا محسن .

الجلاس

يا جلاس الشوق فاض بي وطول
يا ما دبت معاك وانا مش دارى

يا مسبب نارى من الأول
دلوقت بس طغيت نارى

يا جلاس من ساعة ما شفتك
دبت فى شفائىها بغير منك

دلوقت أنا اللي حانوب عنك
واكشفت عن حبي للدارى

يا مسبب نارى من الأول
دلوقت بس طغيت نارى

الى بيحب ومش طاييل أنا عندي دواه
الجلاس الجلّاس ...

واللى له بخت لسكن مايل فى إيديه هنا

الجلاس الجلّاس ...

دانا يا ما الشوق فاض بي وطول وانت اللي طغيت يا جلاس نارى
يا مسبب نارى من الأول دلوقت أنا اللي حاخه نارى

«كلمات مأمون الشناوي»

انس الدنيا

انس الدنيا وريح بالك
واوع تفكر في اللي جراك
انس الدنيا

يا اللي دموعك لحبسايبك
قل لي ابتسامتك تبقى لمن
أوع الغرام يشغل قلبك
دا لسه فيه في العمر سنين
مين الهنا يبقى قصاده
وتشغله عنه همومه
يا عاشق الليل لسواده
قابت لمن عشق نجومه
ليه تشغل بالك مين يرحم حالك

كل الى احبه حوالبه
مين زبي في الدنيا اتهمى
حتى النجوم ملك ايديه
آدى النعيم آدى الجنة
دوق الجمال وامتتع بيه
من قبل ما يدبل ويزول
واوع يفوت يوم تحزن فيه
واسهر ده بكره النوم حايطول
ليه تشغل بالك مين يرحم حالك

رمضان ١٤٠٥ هـ - مايو ١٩٨٥
مطبعة مكتبة الآداب - المطبعة النموذجية



التمن ٢٠٠ قرش